



.....

القاتل الحقيقي

.....

~~~~~

هبة سعيير

~~~~~



اسم الرواية: **الغانل الحقيقي**.

اسم المؤلفة: **هبة سعيد**.

المدير العام: **نهى محمود**.

مدير التوزيع: **مصطفى الحلو**.

تصميم وإخراج فني: **هَمَّت العزب**.

تصميم الغلاف: **دعاء السيد**.

التصحيح اللغوي: " **أولي النهى للتصحيح اللغوي** "

نهى محمود / هبة سعيد.

الطبعة الأولى: ٢٠١٧

رقم الإيداع بدار الكتب والوثائق المصرية: ٢٠١٧/٢٣٢١٥.

الترقيم الدولي: ٨-١١-٦٦١٠-٩٧٧-٩٧٨.



١٧ش حسن وهبة من شارع الهرم الرئيسي

خلف كايرو مول.

موبايل / ١٠١٤٦٢٤٢٨٨

البريد الإلكتروني:

nohamahmoud.171186@gmail.com

elshahdpublishing2016@gmail.com



مقدمة

رُبينا منذ نعومة أظافرنا على عادات وتقاليد
حلّت محلّ الحلال والحرام؛ فارتكبنا تحت ستارهم
الكثير والكثير من الخطايا معللين ما نفعله بالحفاظ
على عادات وتقاليد بريئة مما نفعله؛ فنحن من
نصنع تماثيل تلك العادات والتقاليد ثم نعكف على
عبادتها.

فهل أسعدتنا هذه العادات وتلك التقاليد؟! هل
جعلت حياتنا أكثر استقراراً وقلوبنا أكثر حباً؟!
ما بين الحب والعادات والتقاليد



القائل الحقيقي

بقلم: هبة سعيد



إهداء

صديقتي الغاليات
أدامكن الله في حياتي
وأنا بكن أيامي
فلولا وجودكن فيها
ما خطت يساري ذاك الحوار
ما بين الحب والعادات والتقاليد
القائل الحقيقي
بقلم: هبة سعيد



الفصل الأول

جرمة قتل



عاد عم هريدي حارس إحدى العقارات القديمة من الخارج مُحضراً معه طلبات لأحد سكان الدور الرابع، وعند صعوده درجات السلم وجد باب شقة الأستاذ عبد الغفار مطاوع المحاسب بإحدى شركات القطاع العام بالدور الثالث مفتوحاً على مصراعيه، تعجب عم هريدي لعلمه بأن أصحاب الشقة قد غادروا صباحاً مُتجهين إلى بلدتهم في عزاء تاركين ابنتهم سها وحدها في الشقة لتستذكر دروسها لأن لديها امتحان في كليتها في صباح اليوم التالي.

دق عم هريدي الجرس ونادى عليها بصوت مرتفع ولكنها لم تجب عليه مما أثار الريبة بداخله، ومع علو صوته بدأ الجيران في الانضمام إليه، دخل عم هريدي الشقة ومعه بعض الجيران ليبحثوا عنها في الشقة فوجدوا محتويات حجرة نومها في حالة من الفوضى ووجدوها ملقاة على الأرض قاطعة النفس مفتوحة العينين.

أسرع الأستاذ كامل أحد الجيران إلى الهاتف وقام باستدعاء النجدة والجميع في حالة من الفرع والرعب، وظلّ الجميع متواجدين لحين حضور رجال المباحث...

الرائد أحمد: طب فيه عداوة بين القتيلة وأي حد تاتي؟

عم هريدي (بعد صمت بضع من الثواني): الله يرحمها كانت هادية وملهاش لسان وكل اللي يعرفها لازم يحبها ويحترمها... يقول لحضرتك كانت الأولى على صاحبها دايماً يعني شاطرة وبتفهم!

الرائد أحمد: وانت قاعد على البوابة النهاردة شوفت حد غريب دخل العمارة؟

عم هريدي: بقول لحضرتك طول ما أنا قاعد على البوابة يا سعادة الباشا مفيش نملة تقدر تعدي من قدامي من غير ما أعرف هي داخلة أنهي شقة. الرائد أحمد (متضايقاً من كثرة حديثه): يعني محدش غريب دخل؟؟

عم هريدي: لأ يا سعادة الباشا. تجول الرائد أحمد بالشقة لمعاينتها وكان كل شيء موضوعاً في مكانه ولا يوجد آثار لأي فوضى أو عنف على عكس الوضع في غرفة نوم سها، وجاءه النقيب مهيّب...

النقيب مهيّب: رجاله الطب الشرعي رفعوا البصمات وأخذوا بصمات كل الناس اللي كانوا موجودين وقت اكتشاف الجريمة.

الرائد أحمد: المكان بيوحى إن فيه خناقة حصلت بين المجني عليها والقاتل ومفيش دوايب ولا أدراج مكسورة... يعني مفيش سرقة.

النقيب مُهيب: بس واضح إن المجني عليها
تعرف القاتل لأن الباب مفتوح بطريقة طبيعية
مفيهوش كسر... ده غير إن داخل الشقة مُنظمة
والتكسير في أوضة نومها اللي من الطبيعي
مبيدخلهاش غير حد قريب منها جداً وموثوق فيه.
الرائد أحمد: بس واضح إن القاتل كان خايف
وعلشان كده ساب باب الشقة مفتوح وهو نازل
عشان يجري بسرعة.

النقيب مُهيب: ده معناه إن نية القتل مكانتش
موجودة وإلا ثباته الانفعالي كان هيبقى أقوى من
كده... شكلها كانت خناقة واتطورت فخاف وجري
عشان يلحق ينزل قبل البواب ما يرجع من بره.
الرائد أحمد: إنت هتشتغل محامي للقاتل عشان
تبعد عنه تهمة القتل العمد يا حضرة الظابط؟
النقيب مُهيب: مش قصدي حضرتك... أنا
قصدي إن التخمين ده ممكن يساعدنا في تحديد
القاتل إنه مش حد مُحترف متسلط عليها مثلاً
الرائد أحمد: هيبان... الاستعجال في القضايا
دي مش مطلوب.

النقيب مُهيب: مفهوم طبعاً.
تم استجواب كل من تواجد وقت اكتشاف
الحادث وانصرفوا إلى منازلهم جميعاً لحين احتياج
استجوابهم مرة أخرى في أي وقت لاحق، كما قام
عم هريدي بالاتصال بالأستاذ عبد الغفار والد

المجنبي عليها ليخبره بما حدث لابنته، وأثناء
معاناة المباحث للشقة وجمع الأدلة من بصمات
وخلافه حضر كريم على الفور عندما سمع بما
حدث ل سها من الجيران...

النقيب مهيّب: مين حضرتك؟

كريم: أنا كريم خطيبها.

عم هريدي (مسرعا في الرد): كنت خطيبها يا
بشمهندز... أنت نسيت إن الخطوبة دي إتفكت من
كام شهر!!

النقيب مهيّب: طب لما الخطوبة اتفكت أمال
حضرتك جاي ليه دلوقتي؟

كريم: أنا عارف مين اللي قتلها.

الرائد أحمد: مين اللي قتلها؟!

كريم: واحد من شقة العُراب.

النقيب مهيّب: فين شقة العُراب دي؟

عم هريدي: دي شقة على الصّف الثاني بس
دول ولاد ناس وفي حالهم وملهومش دعوة بحد.

الرائد أحمد: وآيه اللي مخلّيك واثق قوي كده يا
بشمهندس إن حد فيهم هو القاتل؟!

كريم: النهاردة العصر كنت قاعد على حرف
السرير بتاعي وفاتح الابل على تراييزة في
أوضتي وانشغلت شوية فالشاشة إنطفت ورجعت
سودة وشباكي كان مفتوح... بضرب بعيني على
شاشة الابل ف لقيت صورتها وهي واقفة في

بلكونتها وبتشاور لحد ناحيتهم... فهمت من
المشاورة دي إن أهلها نزلوا وهي في البيت
لوحدها... معنى كده إن الحد ده لقي السكة سهلة
إنه يروح عندها وهي لوحدها وحصل اللي حصل.
عم هريدي: حرام عليك يا بشمهندز أنت عارف
إن الست سها الله يرحمها كانت في حالها وأخلاقها
زي الجنيه الذهب.

كريم: ولاد الحرام مخلوش لولاد الحلال حاجة
يا عم هريدي وأنت عارف كده كويس.
الرائد أحمد: تتهم حد فيهم بالتحديد يا
بشمهندس؟

كريم: باليقين لأ.. بس أكثر واحد مشكوك فيه
هو لؤي لأنه أكثر واحد شايف نفسه فيهم.
الرائد أحمد: مين فيهم موجود في شقتهم
دلوقتي يا عم هريدي؟
كريم: كلهم.

عم هريدي: العمدة منبه عليهم كلهم يبقوا في
البيت قبل الساعة ١٢ فتلاقيهم دلوقتي في البيت.
الرائد أحمد: مين العمدة ده؟

عم هريدي: العمدة ده يبقى أبو سي الأستاذ
علي المحامي وسي الأستاذ مروان المرشد
السياحي وعم البشمهندز لؤي والأستاذ عمر
المدرس والدكتور مراد بتاع التوليد.
النقيب مهيّب: يعني علي ومروان إخوات ولؤي

وعمر ومراد إخوان؟
كريم: لأ لؤي مش أخو حد... ده ابن عمهم
برضه.

عم هريدي: الأستاذ علي والأستاذ مروان ولاد
العمدة... والأستاذ عمر والدكتور مراد ولاد سيادة
المستشار الأستاذ فاضل... والبش مهندز لؤي ده
بقي ابن الدكتور معتز من الخواجية اللي إتجوزها
لما كان في بلاد بره بيكمل تعليمه وجابه معاه لما
طلقها قبل ما يرجع مصر.

النقيب مهيّب: طب طلقها ليه؟

عم هريدي: العمدة لما صمم إن الدكتور معتز
يرجع من هناك، مراته الخواجية مرضيتش تيجي
معاه ف راح مطلقها وجاب الولد وجه.

النقيب مهيّب: طب مسبلهاش الولد ليه؟!

كريم: كانت فنانة تشكليه ودايمًا بتسافر تحضر
معارض في أوروبا كلها وعشان كده معترضتش
إنه ياخذ سي لؤي... وسي لؤي كل صيف بيروح
يقضي معاه ثلاث شهور... ومن حبه للرسم زي
والدته طلع مهندس ديكور.



الفصل الثاني

شقة العُزَّاب



دقَّ النقيب مُهيب جرس شقة العُزَّاب ففتح له الباب عم صالح المسئول عن المنزل...
النقيب مُهيب: مساء الخير.
عم صالح: مساء النور يا بني.
النقيب مُهيب: الأساتذة موجودين؟
عم صالح: أيوه حضرتك عايز مين فيهم؟
النقيب مُهيب: كلهم.
عم صالح (مُستغرياً): ثانية واحدة.
تركه عم صالح لعدَّة دقائق على باب الشقة ثم عاد ففتح الباب من جديد ومعه الأستاذ علي...
الأستاذ علي: تحت أمر حضرتك.
النقيب مُهيب: أنا النقيب مُهيب مباحث وكنت عايز أسأل حضراتكم شوية أسئلة بخصوص سها القتيلة اللي في العمارة اللي قصادكم... أكيد سمعتم الخير.
أستاذ علي (مُتاثراً): أيوه... الله يرحمها ويجازي اللي قتلها... تحت أمر حضرتك إتفضل.
دخل مُهيب حجرة الصالون وحضر الشباب جميعاً وجلسوا معه.
النقيب مُهيب (ينظر إلى علي): متعرفتش بيكم؟
علي: أنا علي الأسيوطي... علي عبد المنعم الأسيوطي محامي... وده أخويا عمر مدرس...

ودول مراد ابن عمي دكتور ومروان أخوه صاحب
شركة سياحة... وده لؤي ابن عمنا مهندس
ديكور.

النقيب مُهيب: أهلاً وسهلاً.

علي: أهلاً بحضرتك... تحت أمرك.

النقيب مُهيب: كنت عايز أعرف إذا كان حد فيكم
شاف الأقتيلة النهاردة في البلكونة بتاعتها؟

مراد: آحنا كلنا بنبقى بره البيت ومش بنرجع
لحد الساعة ١٢ تقريباً.

النقيب مُهيب: طيب في أيام الأجازات بتاعتكم
محدث منكم بيشوفها في البلكونة؟

عمر: سها الله يرحمها كانت بنت مُجتهدة وأنا
كنت بدرسلها وهي في الثانوية العامة وملهاش في
وقفة البلكونات أصلاً.

النقيب مُهيب: طيب تشكُّوا في حد ممكن يكون
هو القاتل؟

لؤي: كريم.

النقيب مُهيب: اللي كان خطيبها؟!

لؤي: أيوه.

النقيب مُهيب: ليه؟

لؤي: عشان فسخت خطوبتها منه.

عمر (مُندفعاً): مش معنى إنهم فسخوا الخطوبة
يا لؤي يبقى يروح يقتلها!! كريم ابن ناس ومتربي
وأنا عارف أخلاقه كويس.

لؤي (باستهانة): ده قبل الترامادول.

النقيب مُهيب: ماله الترامادول؟!

لؤي: كريم من سنة بعد خطوبتهم أتلّم على شوية عيال بايظة علّموه ياخذ ترامادول... بعد شوية أهله عرفوا وحاولوا يعالجوه من غير ما يعرفوا أهلها حاجة... بس ولاد الحلال من الجيران قالولهم بعد ما عرفوا.

النقيب مُهيب: مين الجيران دول؟

لؤي: كذا حد مش حد معين.

النقيب مُهيب: عملوا أيه لما عرفوا؟

لؤي: سها كانت بنتهم الوحيدة... خافوا عليها وراحوا لوالدته عشان يفسخوا الخطوبة... بس أمه قعدت تعيط وتتحايل عليهم انهم يصبروا عليه لحد ما يتعالج عشان حالته متسوّش زيادة لو عرف إن الخطوبة اتفسخت وهو في المستشفى.

مروان: فصبروا؟

عمر: قالوا الواد ابن حلال وولاد الحرام مخلوش لولاد الحلال حاجة... وقالوا يستنوا يشوفوا نتيجة العلاج.

النقيب مُهيب: اتعالج؟

مراد: اتعالج وخرج من المستشفى وبقي كويس جداً... بس ولاد الحرام رجعوا اتلموا عليه تاني وحالته اتنكست وساعت عن الأول بكتير... وبقي بيعاني من حالات هياج شديدة وهلاوس وتهيؤات طول الوقت.

النقيب مُهيب: اتعالج تاني؟

لؤي: هرب من المستشفى ومرضيش يتعالج وسها بقت بتتفرّع منه ونفسيته ساعت.

مروان: طبعاً فسخت الخطوبة في المرة الثانية
من غير مناقشة

لؤي: باباها كان عنده حق... حقه وحق بنته...
مش عشان نفسية كريم متبوظش يقهر بنته...
وبعدين هو اللي عمل في نفسه كده يبقى يستحمل
نتيجة اعماله هو مكانش صغير.

النقيب مهيّب: كريم اتعرضلها بعد كده؟
لؤي: عمل فضايح كتيرة وفرج الشارع كله
عليهم لولا إن الجيران كلهم عارفينهم وعارفين
أخلاق بنتهم وعارفين حكايته مع الترامادول
فعرفوا إن هو اللي علطان مش هما.
مروان: لو حضرتك سألت أي حد في الشارع
هيقولك الكلام ده.

النقيب مهيّب: بس جيرانهم واحنا بناخد أقوالهم
محدث فيهم قال الكلام ده!!
علي: طبعي ميقولوش عشان صاينين العشرة
مع أهل كريم... أهل كريم ناس طيبين جداً وفي
حالهم طول الوقت.

النقيب مهيّب: وانتوا مخبتوش زي باقي
الجيران ليه؟

لؤي: حضرتك سألت واحنا جاوبنا لأننا
مبنخافش ومفيش حاجة جيبانا ورا ومخليانا
متخلفين عن العالم المتقدم لحد دلوقتي إلا
المحسوبيات دي.

النقيب مهيّب (موجهاً الكلام ل لؤي): إنت فيه
عداوة شخصية بينك وبين كريم؟
لؤي (مُفاجئاً): عداوة أيه؟! لأ طبعاً...

بالعكس... أنا وهو كنا أصحاب جداً لحد ما عرف
سكة الترا مادول ومرضيش يسمع كلامي ويبطله
فبعدت عنه... عمي العمدة لو كان عرف حكاية
زي دي كان قتلني بيأيده.
النقيب مُهيب: فِضِلْ يعمل المشاكل دي لحد
الحادثة؟

مروان: لأ الحق لله هو سكت من فترة؟
النقيب مُهيب: إشمعنا؟!
مراد: أهله وصلوا لدكتور جديد بدأ معاه العلاج
وبدأت حالته تستقر.
النقيب مُهيب: طب محاولش يروح يعتذرلهم لما
حالته بدأت تستقر؟

علي: والدته طلبت منهم إنهم يستقبلوهم في
البيت عندهم عشان يعتذر بس سها رفضت بشدة
لأن نفسيتها كانت لسة تعبانة من اللي عمله من
فضايح معاها.

النقيب مُهيب: طب ليه بتتهمه دلوقتي يا
بشمهندس لو حالته خلاص استقرت زي ما بتقول؟
لؤي: الله أعلم حالته استقرت فعلاً وألا كان
بينيمهم لحد ما يعمل عملته!! كريم ذكي جداً...
دماغ مهندس إلكترونيات مش سهل تعرف جواها
إيه!!

النقيب مُهيب: يعني إنت بتوجّه الاتهام ل كريم
بشكل رسمي؟
لؤي: أكيد استغل سفرهم وطلعها وهي

لوحدها... هو وراه حاجة غير إنه يبص من شباهه
طول اليوم على بلكونة أوضتها!!

النقيب مُهيب: تمام... كده هحتاج حضراتكم
بكرة الصبح في النيابة إن شاء الله عشان تتسجل
أقوالكم في محضر رسمي.

عاد النقيب مُهيب إلى شقة مها حيث كان الرائد
أحمد قد استقبل الأستاذ عبد الغفار عند عودته من
البلدة بعدما عرف بما حدث لابنته...

الرائد أحمد: البقاء لله يا أستاذ عبد الغفار.
أستاذ عبد الغفار (مُنهارًا): البقاء لله... أنا
هتجنن!! إزاي ده حصل!!

الرائد أحمد: هي بنتك ليها أي أعداء؟
أستاذ عبد الغفار: أبدا... دي يا قلبي ملهاش
لسان وكل الناس بتحبها.

الرائد أحمد: يغني حضرتك مش بتوجه إتهامك
لحد؟

أستاذ عبد الغفار (باكية بشدة):.....
الرائد أحمد: إفتكر حضرتك كويس لو ليها
خلاف مع حد حتى لو بسيط أو قديم.

أستاذ عبد الغفار (بعد فترة من الصمت والتردد):
كريم.

الرائد أحمد: خطيبها السابق!!
أستاذ عبد الغفار: أيوه... هدها كتير بالقتل بعد
مافسحنا خطوبتها منه وقالها مش هخلي حد
غيري يتهنأ بيكي.

النقيب مُهيب: وهو كان حد تاني اتقدملها

عشان يفكر يقتلها زي ما هدها؟
الأستاذ عبد الغفار (بعد كثير من الصمت
وبصوت منخفض): أيوه.
النقيب مهيب: وحضرتك بتوشوشنا ليه يا أستاذ
عبد الغفار؟!

الأستاذ عبد الغفار: أصل الموضوع ده كنا
مخليه سر عشان كريم ميئذيهاش.

الرائد أحمد: ولما الموضوع ده كان سر يبقى
هو عرف منين وجه قتلها بسببه؟!

الأستاذ عبد الغفار: الأمر ميسلمش يعني ممكن
زي ماكان بيراقبها من البلونة طول الوقت يبقى
ممكن كان بيراقبها لما كانت بتخرج كمان.
النقيب مهيب: وهي كانت بتخرج مع خطيبها
الجديد؟

الأستاذ عبد الغفار: لأ طبعاً بس يوم قرابة
الفاحة وتلبس الدبل خرجنا أنا ومامتها وهي الله
يرحمها ولؤي.

النقيب مهيب: بشمهندس لؤي جاركم؟

الأستاذ عبد الغفار: أيوه.

الرائد أحمد: وهو كان معاكم بصفته إيه؟!

الأستاذ عبد الغفار: ما هو العريس!

النقيب مهيب: يعني لؤي بعد الفضايح اللي كريم

عملها ل سها دي كلها اتقدمك وخطبها؟!

الأستاذ عبد الغفار: سمعة بنتي كل الشارع

يحلف بيها وعارفين إن كريم كان بيقتري عليها...

وطلب لؤي لإيدها في الوقت ده رجعلها تفتها في

نفسها من جديد إن حد يكون عارف كل الفضايح
دي ويرضه جاي يتقدملها.

النقيب مُهيب: ده كان أدعى إنكم تعلنوا
الخطوبة عشان كرامتها ترجعها من ثاني.

الأستاذ عبد الغفار: لؤي اقترح نخلي الموضوع
في السر لحد ما كريم يخف خالص عشان حالته
مشتكسش من جديد ويأدي البنت من ثاني.

النقيب مُهيب: بس لؤي ماجابليش سيرة
الخطوبة دي لما كنت عنده من شوية

أستاذ عبد الغفار: لأن الموضوع سر زي ما
قولت لحضراتكم حتى ولاد عمامه مايعرفوش عنه
حاجة

الرائد أحمد: يعني خطبها من غير إذن عمه
العمدة؟!

أستاذ عبد الغفار: قال هيبقى يقوله قبل الفرح
وقت مانعلن الخبر

النقيب مُهيب: ولو كان رفض وقتها؟!
أستاذ عبد الغفار: عمه بيحبه وماكانش هيزعله
خصوصاً إنه كان سبب في إن لؤي إترى بعيد عن
حضن أمه فضميره مأنبه من ناحيته وعاييز يفرحه
بأي شكل

الرائد أحمد: يعني حضرتك بتتهم كريم بشكل
رسمي إن هو اللي قتل بنتك؟

أستاذ عبد الغفار: محدش كان عاييز ياذيها
غيره!

النقيب مُهيب: اللي قتل بنتك دخل لحد أوضة

نومها بهدوء من غير عنف... تفكر لو موقف سها
من كريم كان زي ما بتقول كده يبقى هتدخله من باب
الشقة أصلاً؟!!

أستاذ عبد الغفار: يمكن هددها بسكينة من
ساعة مافتحت باب الشقة لحد مادخل بيها لأوضة
النوم.

النقيب مُهيب: بنت حضرتك ماتت مخنوقة مش
مدبوحة.

أستاذ عبد الغفار (غاضباً): هو حضرتك بتحقق
معايا أنا بدل متحقق مع اللي قتل بنتي؟! حضرتك
سألتنى إنت بتتهم مين وأنا جاوبت.

الرائد أحمد: خلاص يا مُهيب كفاية كده...
حضرتك هتشرف بكرة الصبح في النيابة لسماع
أقوالك في محضر رسمي يا أستاذ عبد الغفار...
والبقاء لله مرة ثانية.

أستاذ عبد الغفار (باكياً): طب أدفن بنتي
الأول!!

النقيب مُهيب: لازم تشريح الجثة الأول قبل
الدفن.

أستاذ عبد الغفار (باكياً بشدة): "لا حول ولا
قوة إلا بالله".... "الله الأمر من قبل ومن بعد"....
"الله ما أعطى والله ما أخذ."



الفصل الثالث

في النيابة



حضر الجميع إلى سراي النيابة باكراً...

لؤي: البقاء لله يا عمي.

أستاذ عبد الغفار: ونعم بالله.

لؤي: أنا اتهمت كريم إمبراح إن هو اللي قتل سها وعشان كده جاي النهاردة أقول الكلام ده في محضر رسمي.

أستاذ عبد الغفار: أنا كمان عملت كده وقولت لهم إن أنت خطبتها قبل الحادثة.

لؤي (مستنكراً): ليه بس كده يا عمي؟! أنا مقولتني ده إمبراح.

أستاذ عبد الغفار: متخافش يا بني أنا فهمتهم إن أنت مكانش ينفع تقول كده قدام ولاد عمامك عشان الموضوع سر... أنت الوحيد اللي كنت مفرح بنتي بعد اللي عمله معاها كريم ومستحيل أأذكك دلوقتي في وسط ناسك.

لؤي: خلاص يا عمي ولا يهمك... على العموم كويس إنك قولتني عشان أقول جوه لما أدخل عند وكيل النيابة.

أستاذ عبد الغفار: كريم اتهمكم إمبراح إن حد منكم هو اللي عمل كده وإنك على وجه التحديد.

لؤي (مذهشاً): إيه اللي خلاه يقول كده المجنون

ده؟!

أستاذ عبد الغفار: شافها في شاشة اللاب بتاعه
بتشاور لحد من البلكونة ناحيتكم قبل الحادثة على
طول.

لؤي: إمام... عشان كده النقيب مهييب جالنا
مخصوص بالليل يتكلم معانا... عامة ماشي.
أخبر لؤي الشباب سريعاً بهذا الكلام قبل
دخولهم لوكيل النيابة لسماع أقوالهم...

مراد: شاشة آيه ولاب آيه المهووس ده!!
علي: كده يبقى احنا كمان لازم نوجهله نفس
الاتهام بأن هو اللي قتلها بسبب المشاكل اللي كانت
بينهم.

عمر: لأ طبعاً مستحيل... أنا مش ممكن أشهد
على كريم في حاجة زي دي.

مروان: آمال إنت جاي ليه النهاردة يا مستر؟!
عمر: أنا جاي عشان الظابط إمبراح طلب مننا
نشهد بالمشاكل اللي كانت بين سها وكريم... وأنا
جاي على الأساس ده وبس... إنما أتهمه بقتلها ف
ده مستحيل وأنا مش هعمل كده.

لؤي: خلاص متقولش... كفاية احنا هنقول
ونبقى أربعة قصاد واحد،

عمر: إنتوا أحرار.
مروان: إبقى ورينا هتفضل أسد كده قدام عمك
العمدة لما يعرف إنك مرضيتش تقف في ضهر

لؤي ابن عمك وتشهد ضد اللي عايز يورطه وألا
هتقلب قطة وقتها؟

لؤي: خلاص يا مروان... كل واحد حر...
ومتشكر قوي يا مستر.

عمر: يا لؤي افهمني أرجوك وبعدين ما هو
اتهمنا احنا كمان... يعني أنا زي زيك.

لؤي: فاهمك وعلشان كده مش زعلان منك.
و بالفعل تم سماع شهادتهم وانصرفوا من

سراي النيابة كـ شهود ليس عليهم غبار ولا أي
دليل يدين أحداً منهم على اتفاق بعدم مغادرة البلاد

قبل مراجعة النيابة التي قد تحتاجهم للشهادة من
جديد إلا لؤي الذي تمَّ أخذ بصماته على اعتبار إن

كريم ليلة وقوع الحادث وجَّه الاتهام إليه بصفة
خاصة، كما حضر كريم إلى سراي النيابة لسماع

شهادته هو الآخر...
وكيل النيابة: صحتك عاملة أيه دلوقتي يا

بشمهندس؟
كريم: الحمد لله أنا خفَّيت خلاص!

وكيل النيابة: طب أيه ردك على اتهام أستاذ عبد
الغفار بانك اللي قتلت سها؟

كريم (مُنزعجاً وهو الذي اعتبر نفسه قادماً
للنيابة كشاهداً وليس كمتَّها): مستحيل أقتلها...

محدث بيقتل روحه!!
وكيل النيابة: إنت كنت بتحبتها؟

كريم: أنا لسه بحبها.
وكيل النيابة: بس سها ماتت خلاص.
كريم: بس لسه حبها جوه قلبي مماتش.
وكيل النيابة: بس سها موقفتش جنبك في
مرضك!!

كريم: وقفت جنبى أول مرة لحد ما اتعالجت بس
أنا اللي خدلتها ورجعت للهباب ده تاني.
وكيل النيابة: طب لما إنت فأهم كده ليه
الفضايح اللي عملتهاها لما سابتك؟
كريم: كنت لسه ساعتها مبدأتش العلاج الجديد
مع دكتور عبد الرحمن اللي بيباشر حالتي
دلوقتي... أنا حالتي بدأت تستقر والدليل على كده
إني بطلت الفضايح دي من فترة.

وكيل النيابة: تقدر تثبت إن إنت مقتلتهاش؟
كريم: مفيش إثبات أصلاً إن أنا قتلتها!!
وكيل النيابة: بص يا بشمهندس... إنت شكلك
ابن ناس ومش وش بهدلة... فياريت تتكلم معايا
عدل عشان ماضطرش أغير معاملتي الهادية دي
معاك.

كريم: أنا مبخرجش من البيت غير لما يروح
جلسات العلاج بتاعي... حضرتك ممكن تسأل عم
هنداوي بواب بيتنا... هو راجل كبير في السن
ومش بيسيب اليواية عندنا.
وكيل النيابة: طب ليه وجّهت اتهامك لحد من

شقة العُزَّاب اللي ساكنين في البيت اللي في وش بيتها دول بالذات؟!!

كريم: يوم الحادثة كنت قاعد في أوضتي وشباكي مفتوح واللاب بتاعي مفتوح فانعكاس صورتها وهي واقفة على باب بلكونتها كان باين عندي على شاشة اللاب إنها بتشاور لحد وكأنها بتعرفه إنها قاعدة لوحدها.

وكيل النيابة: يابشمهندس قولتلك تعالي معايا عدل بلاش تهيؤات... محدش لسه بيقف في البلكونة يشاور لحد... الموبايلات مالية الدنيا والدقايق تقريبا بقت ببلاش... وبعدين على كلامك ده يبقى ممكن تكون إنت اللي استغلّيت المعلومة دي بفرض إن ده حصل أصلاً وتكون إنت اللي طلعت عندها وقتلتها.

كريم: أستاذ عبد الغفار راجل بخيل مش بيديها مصروف غير على أد مواصلاتها بحجة إنه خايف عليها من فرط الفلوس في إيدها حتي سندوتشاتها كانت بتأخذها معاها من البيت... وأفتلها ليه وأنا لسه بحبها!! ولو أنا اللي عملت كده يبقى هقولكم كده وكاني مش واخد بالي إن الفرض ده أكيد هيجي علي بال المباحث أو النيابة!! أنا أدمنت ترامادول مش جالي تخلف حضرتك!!

وكيل النيابة: طب لو أنا صدقت حكاية بخل باباها دي... كونك لسه بتحبها ف ده معناه إنها

بنت أخلاقها كانت كويسة... يبقى إزاي بتقف تكلم
شباب من بكونتها؟ مش جراءة زيادة دي!!
كريم: الزن على الودان أمر من السحر والفتنة
الأخيرة أنا كنت سبب في توترها ويمكن حد فيهم
استغل حالتها واستغل ضعفها ودخل قلبها من النقطة
دي.

وكيل النيابة: وليه اتهمت لؤي بالتحديد؟
كريم: لأ مش بالتحديد.. لما حضرة الظابط طلب
مني أحدد منهم واحد.. قولت هو الأقرب لأن هو
اللي شايف نفسه فيهم.. بس مش بالضرورة يكون
هو، تم أخذ بصمات كريم وانصرف لبيته نظراً لأنه
لا يوجد أي دليل ضده حتى الآن.
كما أمر وكيل النيابة كمال محفوظ المباحث
بمراقبة كريم وشباب شقة العُزاب ٢٤ ساعة
يوميًا.



الفصل الرابع

في مكتب علي المحامي



بعد خروج الشباب من سراي النيابة توجهوا إلى مكتب علي لمناقشة بعض الأمور المستجدة...
علي: إنت مقولتنناش ليه قبل كده يا لؤي موضوع خطوبة سها دي؟
لؤي: قولتكم كان سر عشان أهلها خافوا من رد فعل كريم وقت تعبته.
علي: ومقولتنناش ليه إمبراح بعد الظابط ما مشي من عندنا؟!
لؤي: احترمت سرها بعد ما ماتت.
علي: وليه قولت دلوقتي؟
لؤي: أبوها اللي فضح السر... يبقى خلاص مفيش حاجة لو قولت أنا كمان.
مروان: إنت كنت هتكمل الجواز دي وألا كانت أمريكياني زي كل مرة؟
لؤي: عيب عليك البنت دي مش وش لعب.
مروان: طب عيني في عينك كده!!
لؤي: لو كانت أمريكياني كنت هاخذك معايا زي كل مرة بروح أخطب فيها واحدة وأقضي معاها الشهر وأسببها بعد ما أخذ اللي أنا عايزه منها.
عمر (منزعجاً بشدة): أيه اللي بتقوله ده منك له؟! إنت كنت بتخطب بنات الناس وتهتك عرضهم

وتسيبهم بعد كده!!
لؤي: الله يباركك احنا مش في حصة مدرسة
دلوقتي... مفيش واحدة بتفرط في حاجة غصب
عنها.

عمر: أيه الاستهتار والبرود ده!! البنات دول
بيأمنوك عشان دخلت البيت من بابيه!!

لؤي: هي الدبلة بقت كتب كتاب وأنا معرفش!!

عمر: الفاتحة كتاب... أهلكنا علمونا كده!!

لؤي: تعليم فاشل زي اللي بتعلموه للولاد في
المدارس بالظبط... وبعدين مش كفاية إن أنا
مزعلتش منك النهاردة ساعة النيابة!! هنبدا حصة
جديدة هنا كمان!!

علي: الكلام ده مش وقته دلوقتي خلونا في
المهم... يعني إنت ملكش دخل في اللي جرتها ده
يا لؤي؟

لؤي: إنت بتشك فيا يا علي؟!!! بقولك باخد
اللي عايزه بالرضا وبمشي... وأكيد يعني لو عايز
حاجة زي دي مش هيبقي جوا بيتها... أضعف
الإيمان هقابلها بره في السر ده حتى إذا بُليت
فاستتروا!

علي: أنا مش بسالك عشان بشك فيك والألا...
أنا بسالك عشان لو متورط في حاجة أعرف أظبط
دفاعي عنك من دلوقتي.

لؤي: متخافش أنا صاغ سليم.

علي: طب أنا عايز أعرف كل واحد فيكم قال
كان فين وقت وقوع الجريمة.
مراد: أنا كنت في المستشفى بعمل ولادة
قيصرية وده مثبت في الأوراق.
عمر: وأنا كنت ف السنتر عندي حصة ثانوية
عامة وكرانيهات الطلبة اللي مختوم فيها إنهم
حضروا الحصة كفيفة بإثبات صحة كلامي.
مروان: قولت كنت مع صحابي.

علي: وإنت كنت فين؟
مروان: كنت عند سناء.
علي: طب مقولتش الكلام ده ليه في النيابة؟
مروان (مُندفعًا): إنت اتجنت!! هقول إيه؟ كنت
عند مراتي اللي متجوزها عرفي من ورا أبويا
العمدة عشان مطلقه وعندها ولدين وبنت وهو
مصمم إنني أتجوز بنت بنوت!!
علي: وفيها إيه لَمَّا تقول؟ مش عشان تنقذ
نفسك من حبل المشنقة!!

مروان: عشان أبوك يجي يطْخني وطلقها
پروح ياخذ العيال منها وش!! وبعدين حبل مشنقة
إيه إنت كمان!!

علي: طب وقولت مين صحابك دول؟
مروان: سامي وزيزو اللي شهدوا على عقد
جوازي أنا وسناء... حكيتلهم اللي حصل وصعب
عليهم أجيب سيرة سناء في النيابة فوافقوا إنهم

يشهدوا لو اتسألوا إنهم كانوا معايا.
عمر: شهادة زور.
مروان: شهادة يستروا بيها ولية.
علي: وإنت يا لؤي قولت كنت فين؟
لؤي: قولت كنت بعمل شوبنج عشان محتاج
بدلة جديدة أروح بيها فرح طارق صاحبي.
عمر: إنت بتستهبل!! إنت كل هدومك بتجيبها
وإنت راجع من السفر من عند أمك.
لؤي: وهما كانوا هيعرفوا الشوبنج بتاعي
بعمله منين إنت كمان!!
علي: طلبوا منك فواتير شرا تثبت مكانك في
الوقت ده؟
لؤي: قولت ملقيتش حاجة عجبتني فرجعت
البيت ونمت.
علي: وإنت كنت فين في الوقت ده؟
لؤي: كنت بظبط عروسة جديدة.
عمر (مُدهشاً): الله يخرّب بيتك إنت مش لسه
بتقول كنت خاطب سها قبل ما تتقتل!!
لؤي: بقولك سها دي بنت ناس تتخطب للجواز
والبيت والعيال إنما عروسة امبارح دي كانت
خطوبة أمريكي كالعادة.
مروان: يعني مجبتليش سيرة المرادي!!
لؤي: بقولك كنت لسه بظبط بس شكلها فقر من
أولها يخرّب بيتها!!

عمر: قول شكلها بت حلال وربنا بيحبها
وساترها معاها ومع أهلها.
مراد: طب ولو سألوك عن الأماكن اللي عملت
فيها الشوبنج وراجعوا الكاميرات وملقوش حضرتك
فيها؟!!!

لؤي: هقول كنت بتفرج على الفاترينات لحد ما
ألاقي حاجة تعجبني وبعدين أدخل فلما مشوفتش
حاجة عجبتي مدخلتش.

مروان: وعرفت تظبط العروسة دي في الآخر؟
لؤي: عيب عليك إنت عارفي.

علي: طب تمام كده.
لؤي: إنت بقي يا أستاذ علي كنت فين حضرتك
وقت وقوع الجريمة؟

مروان: لا علي أخويا بره الليلة بتاعة الحريم
دي خالص... إنت نسيت يا ابني وألا أيه!!
علي: نعم إنت وهو!! إنتوا هتفوقوا عليا وألا
أيه؟

لؤي: إنت عمال تسألنا كنتوا فين... يبقى لازم
نعرف احنا كمان إنت كنت فين عشان نعرف
نتصرف ونشوفك محامي كويس من دلوقتي يظبط
دفاعه عنك لو كان لك يد في اللي حصل ل سها.
مروان: يا ابني قولتك علي أخويا بره الليلة
دي من ساعة ما ساب كوكي لما أبونا العمدة
والحاجة رفضوا الجواز دي.

لؤي: قهر واستعباد... هما عشان خلّفوه
يتحكموا في قلبه وفي اختيار شريكة حياته؟!
مروان: أنت عارف إن الجوازة دي كانت هتبقى
مصدر قلق للعيلتين.
لؤي: طب وفيها أيه لَمَّا مسلم يتجوز مسيحية
مادام مش حرام!!
مراد: مش حرام في الدين عندنا، بس خطيئة
عندهم وعيلتها مكانتش هتسكت وكان هيتفتح بحر
دم ملوش آخر.
لؤي: فيقهرُوا البنت والولد وهي تترهبين
وتدخل الدير وهو يقضي باقي حياته مموت نفسه
ما بين المحكمة والمكتب لأخم نفسه في قضايا
تعويضات الغلاية؟!
عمر: دي رسالة حق بيأديها.
لؤي: مغرفش يجيب حقه لنفسه يبقى هيعرف
يجيب حق غيره!! فاقد الشيء لا يُعطيه.
عمر: غلط... فاقد الشيء أكثر واحد بيحس
بوجع غيره المحروم زيه وعشان كده بينصف
الغلاية ويقف في ضهرهم.
لؤي: وهو حقه فين؟
على (مُستسلمًا): عند الله... حقي عند الله.
مراد: ونعم بالله... عايزنا في حاجة تانية يا
علي وألا خلاص؟ عشان عندي عملية كمان ساعة
ولازم الحق أروح المستشفى.

علي: لأ خلاص كده... بس ياريت كل واحد فيكم
الفترة الجاية يعرفني كل حاجة تخصه أول بأول
لحد ما القضية دي تخلص وتعدي على خير.
مروان: هي كده مش خلاص خلصت من
ناحيتنا؟!

علي: أكيد النيابة والمباحث مش هيسبونا في
حالنا لحد ما يوصلوا للمجرم الحقيقي... يعني يا
مروان بلاش سهرات قمار اليومين دول.
مروان: والقمار ماله بجريمة القتل؟!
علي: لو بيراقبوك يبقى مفيهاش حاجة لمّا
ظابط مباحث يجامل ظابط صاحبه في مكافحة
الآداب مثلاً.

مروان: وأنا مالي ومال الآداب؟!
علي: الشقة اللي بتروح تلعب فيها... قمار
بس؟!!!!
مروان: لأ.

علي: يبقى اتقي الله في نفسك وفينا اليومين
دول شوية عشان لو اتمسكت وعرفت أعديك منها
مش هعرف أعديك من تحت إيد أبوك العمدة...
كمان متحاولش تروح اليومين دول ل سناء.
مروان: إنت بتهرج. صح؟! لا قمار ولا
سناء؟!!!! طب أعيش أعمل أيه في حياتي أنا؟
عمر: شوف شغلك يا أخي وانتبه لشركة
السياحة بتاعتك شوية فرصة تعدل حالها اللي مال

من مدة.
لؤي: إنت ليه يا عمر محسّسني إنك شيخ من
شيوخ الأزهر أو داعية في قناة فضائية من بتوع
اليومين دول مش مدرس إنجليزي وراجل عقله
كبير ومُفتتح؟! وألا كنت بتخالف العادات والتقاليد
إنت كمان ليه ورايح تحب واحدة أكبر منك في
السن؟

عمر: سيدنا النبي عليه أفضل الصلاة والسلام
اتجوز السيدة خديجة رضي الله عنها وكانت أكبر منه
ب ١٥ سنة.

مروان: طب ما هو اتجوز برضه السيدة ماريّا
القبطية... يعني علي أخويا مغلطش لمّا حب
كريستين.

مراد: يا جماعة الخير الله يصلح حالي
وحالكم... الكلام ده كله ملوش لزوم دلوقتي...
السيت حامل في توأم وحالتها حرجة ولازم أروح
أولدها دلوقتي.

علي: خلاص يا شباب نتقابل بالليل على العشا
إن شاء الله... تقدروا تمشوا دلوقتي.



الفصل الخامس

وشوش



نزل مراد من مكتب علي مُسرّعًا ليلحق
المریضة بالمستشفى وأثناء قيادته للسيارة رنَ
هاتفه الجوال...

مراد: ألو.

سوزان: ألو!! ببساطة كده ألو!!

مراد: والله يا حبيبتي غصب عني... أكيد
عرفتي اللي حصل امبارح ل سها؟

سوزان: الله يرحمها عرفت من ماما وزعلت
قوي والله، وسهيلة من ساعة ما عرفت وضغطها
وطي، وماما وبابا محتاسين بيها من وقتها
والدكتور كان عندهم طول الليل بيركبلها في
محاليل لحد ما حالتها بدأت تستقر من شوية.

مراد: طب الحمد لله ألف سلامة عليها يا

حبيبتي.

سوزان: تسلملي يا حبيبي يارب... بس تعالى
هنا مقولتليش إنت أيه دخلك في موضوع سها؟!
تكونش كنت بتحبتها في السر من ورايا!!

مراد: أحبها أيه وهباب أيه بس!! ده كريم الله
يخرب بيته اتهمنا أنا وأخويا وولاد عمامي إن حد
فينا اللي قتلها لأنه شافها بتشاور لحد من بلكونتها

قبل الحادثة فيما معناه إنها في البيت لوحدها.
سوزان: طب ما يمكن كانت بتشاو ل سهيلة!!
مراد: تصدقي صح!! مجاتش في بال حد فينا
دي

سوزان: طب وعملتوا أيه؟
مراد: اتهمناه احنا كمان بان هو اللي قتلها لأنه
سبق وهددها بالقتل قدام الشارع كله.
سوزان: يا نهار أسود!! كده ممكن يأديكم ده
مجنون ومش مسئول عن تصرفاته!! وأصلاً
النيابة المفروض متاخذش بشهادته لأنه مريض
نفسي وخاضع للعلاج الفترة دي.
مراد: نفسي مش عقلي وكمان بدأت حالته
تستقر... وكده كده النيابة أخلت سبيلنا وسبيله لأن
مفيش دليل ضد أي حد فينا بس وكيل النيابة طلب
مننا محدش يسافر من غير مايقوله عشان لو
احتاجنا تاني في أي وقت.
سوزان: يحتاجكم تاني ليه؟
مراد: ممكن تظهر أدلة جديدة تدين حد فينا من
جديد.

سوزان: يا ساتر يارب.
مراد: حبيبتي بلاش نتقابل اليومين دول لحد
الموضوع ده ما يعدي علي خير.
سوزان: طب ليه بقى الكلام اللي يزعل ده!!
مراد: حبيبتي علي بيقول ممكن يكونوا

بيراغبونا وده ممكن بعملك مشاكل مع جوزك لو حد كان بيراقبني وشافك معايا.

سوزان: خلاص أرجع أجيلك العيادة تاني زي الأول... إنت ناسي إن أول معرفتنا كانت فيها؟
مراد: حبيبتي إنت ناسية إن موضوع الخلفة ده إنت نهتيه مع جوزك بإنك خلاص مش عايزة تتعالجي وهو لو عايز عيال يروح يتجوز واحدة تانية!!

سوزان: يوه... هقوله حاسة بتعب ومحتاجة أروح للدكتور عشان أطمئن... مش قضية يعني.
مراد: لا بلاش الفترة دي أحسن احنا منضمنش الظروف.

سوزان: طب أشوفك لما أروح ل ماما؟
مراد: هتشوفيني فين؟ في بير السلم مثلاً!! إنت ناسية إننا ساكنين في الشارع سوا ومشوفتكيش غير لما جتيلي العيادة ومعرفتش إنك جارتني أساساً غير بعد ماتصاحبنا!!

سوزان: اتصاحبنا؟! بقى اسمها دلوقتي لما اتصاحبنا يا مراد!!

مراد: حبيبتي إنت عارفة قصدي كويس وإن كلامي مقصدش بيه أي حاجة وحشة... احنا قعدنا فترة صحاب ع النيت بعد مجتيلي العيادة بتفضضيلي عن مشاكلك مع جوزك قبل ما الحكاية تقلب بينا لحب.

سوزان: شكلي أنا اللي حبيتك إنما إنت وقفت
عند مرحلة الصحاب دي وبس
مراد: بس يا مجنونة متخرفيش في كلامك...
مش بحبك أيه إنت كمان!! أَمَال مقابلاتنا دي كلها
اللي حصلت تسميها أيه!!

سوزان: أسمىها نزوة أو لحظة متعة بترتاح
فيها شوية من تعبك طول اليوم.
مراد: إنت شيفها كده؟!

سوزان: إنت شايفها غير كده!! واحدة شأطتها
من العيادة واتصاحبوا ع أنت وجمعكم في الآخر
البحث عن المتعة... يبقى أفرق أيه أنا عن أي
واحدة جبتها من الشارع فضيت معاها ليلة وف
الآخر عطيتها اللي فيه النصيب.
مراد: وأنا بقى عطيتك اللي فيه النصيب وألا
لسه؟

سوزان: الحساب مدفوع مقدماً يا دكتور... أنا اللي
جريت وراك من الأول لما ارتاحتك وحسيت إنني
حبيتك.

مراد: يبقى إنت اللي شأطيني من الشارع مش
العكس.

سوزان: تصدق صح وكده ليك حساب عندي
ولازم أدفعه.

مراد: يبقى تبجي النهاردة العيادة تدفعي حق
الكشف وتدخلني في دورك بس تعالى متأخر عشان

تدخلي آخر واحدة.

سوزان: طب ماكان من الأول!!

مراد: لأ معلش أنا بحب أتهزق من حبيبتي وأحس أد أيه أنا واطي وحيوان وإن هي بتضحى بحياتها وبيتها وسمعتها عشان بتحبني في الوقت اللي أنا مش عارف أقولها اطلقي ونتجوز. سوزان: أنا عارفة إن العمدة مستحيل هيوافق على جوازك من واحدة مطلقة.

مراد: سوزان.

سوزان: نعم يا حبيبي؟

مراد: احنا كده مش صح... احنا بنعمل الغلط عشان خايفين من العبد بس بخوفنا ده بنغضب ربنا.

سوزان: مش فاهمة يا حبيبي.

مراد: احنا بنعمل اللي يخلي ربنا يغضب علينا ويهز عرشه من فوق سبع سماوات عشان العمدة يكون راضي عني مع إن في الآخرة أنا وإنْت هنتحاسب لوحدنا بعيد عنه.

سوزان: طب والحل؟

مراد: اطلقي.

سوزان: وبعدين؟!

مراد: هتجوزك... هتجوزك حتى لو بعلم أهلك بس من غير أهلي مايعرفوا سوزان: بابا مش هيوافق أتجوز في السر.

معاه.
مراد: طب ما أنا بقولك اطلقني أهو وأنا
أتجوزك!!
سوزان: في السر؟!... عايز تتجوزني في السر
يا مراد؟!
مراد: مش أحسن من اللي بنعمله مع بعض في
السر برضه.
سوزان: ماشي يا مراد... بس وحياة حبي
ليك... لو غدرت بيا بعد ما اطلق لأكون قاتلاك
بأيدي وأنا كده كده داخل النار.
مراد: لا حول ولا قوة إلا بالله... حد يقول أنا
داخل النار!!
سوزان: وهو اللي بنعمله مع بعض ده
ميدخلناش النار؟!!!
مراد: مقولتك هنصلح غلطانا خلاص
وهنتوب... غلطت أنا!!
سوزان (مستسلمة بعد فترة صمت): لأ... مش
غلطان.
مراد: يبقى تبدأي تنفذي اللي قولتك عليه لحد
ما تطلقني على ماتكون قضية سهادي خلصت والدنيا
هديت من حوالينا ولحد الوقت ده ميعدي مش
هنتقابل.
سوزان: مراد.
مراد: حبيبتي أنا هقفل معاك عشان وصلت
المستشفى خلاص... سلام يا قلبي.

سوزان (خاضعة): سلام يا حبيبي.
مراد: بحبك.
سوزان (دامعة): وأنا كمان بحبك.



الفصل السادس

شهادة جديدة



عاد الشباب إلي منزلهم في المساء واجتمعوا
على العشاء كالعادة...

علي: شوفتوا اللي حصل!!

مروان: خير؟؟

علي: أستاذ عبد الغفار أبو سها الله يرحمها
طلبني النهاردة وعاييزني أمسكه القضية.

عمر: ووافقت؟

علي: طبعاً.

مراد: بس إنت موقفك صعب لسببين الأولاني
إننا مشكوك في أمرنا لحد دلوقتي على الأقل من
النيابة والمباحث، والسبب الثاني إن كريم هو كمان
مشكوك فيه ولو ثبتت عليه هتعيش في عداوة هنا
مع أهله.

علي: كوني أقبل القضية ف ده ضروري عشان
أتابع الموقف من قريب وعشان ميتقالش إنني
رفضتها لأن علي راسي بطحة أنا وأخواتي... أما
بالنسبة ل كريم ف أهله عارفين كويس إن الحق
حبيب الله.

لؤي: يعني قبلتها خلاص؟

علي: أيوه وطلبت كمان سهيلة للشهادة.

مراد: ليه؟

علي: لأنها صاحبته الأنتيم وكانت بتكلمها على طول من البلكونة.

لؤي: لو أثبت إن كريم شهادته غلط ده هيساعدك في إنك تثبتها عليه بعد كده؟ مروان: مش شرط على فكرة.

عمر: بيقولك القاتل دخل لحد أوضة نومها بسهولة وأكيد هي مش هبلة عشان تدخله بهدوء كده!!

لؤي: ممكن تحت تهديد السلاح. علي: ماتت مخنوقة وملقوش سلاح في المكان والوقت كان ضيق إن القاتل يركز هو داخل بأيه وخارج بأيه.

عمر (مستقر البال): معنى كده إن كريم فعلاً مُستبعد يكون هو القاتل. لؤي: خلاص نشيلها احنا ويبقى حد فينا هو اللي قتلها!!

مروان: مش معنى إن كريم مش هو القاتل يبقى حد فينا هو القاتل.

علي: فعلاً وعشان كده أنا طلبت شهادة سهيلة بس هي تعبانة من ساعة ما عرفت خبر الحادثة والدكتور مانع سؤالها دلوقتي.

عمر (حزيناً): الخبر ده كسر وسط الواحد والله... الله يرحمها.

بعدما أفاقَت سهيلة من صدمتها ذهبت إلى سراي النيابة لتدلي بشهادتها...

سهيلة: يوم الحادثة طلعت البلكونة في الميعاد
بتاعنا زي كل يوم عشان أطمئن عليها... فقالتلي
إن باباها ومامتها مسافرين البلد عشان حصلت
حالة وفاة ورايحين يعزوا فيها.

وكيل النيابة: يعني هي كانت بتشاورلك إنت؟

سهيلة: أيوه طبعاً.

وكيل النيابة: طب مش وارد إنها شاورت

لخطيبها قبلك أو بعدك؟

سهيلة: لأ طبعاً مستحيل!! الخطوبة كانت في

السر محدش يعرف عنها حاجة... يعني لو حد

شافها بتشاورله هيقول عليها أخلاقها وحشة... ده

غير إن كريم كان راشق عينه على بلكونتها طول

الوقت.

وكيل النيابة: تفتكري كريم يكون هو القاتل؟

سهيلة: الله أعلم بس معتقدش.

وكيل النيابة: ليه؟

سهيلة: كريم بيحبها طول عمره وكلنا عارفين

كده كويس ومستحيل يعمل فيها كده.

وكيل النيابة: بس هو دلوقتي اتغير.

سهيلة: لو كان ناوي يعمل حاجة مكانش شهّد

الشارع كله عليه إنه ناوي يأذيها... اللي بيعمل

مبيقولش واللي بيقول مبيعلمش.

وكيل النيابة: علاقتها بخطيبها الجديد كانت

كويسة؟

سهيلة: جداً... كان بيتمنالها الرضا ترضى.

وكيل النيابة: كان بيقابلها بره لوحدهم؟

سهيلة: لا لا... باباها لو كان شم خبر بحاجة زي دي كان قتلها هو شخصياً.

وكيل النيابة: هو باباها كان صعب قوي كده؟

سهيلة: بنته الوحيدة اللي جابها بعد شوقه.

وكيل النيابة: طب خطيبها كان بيتواصل معاها

إزاي؟

سهيلة: عن طريقي... كنت لما بروحلها برن

عليه فيكلمها على فوني.

وكيل النيابة: هي حبت مين فيهم أكثر؟

سهيلة: لؤي.

وكيل النيابة: ليه؟

سهيلة: ابن ناس كده نص عمره مقضيه في

أوروبا... كلامه معسول ولبسه جميل وشكلة

خواجاتي وذوق ذوق ذوق مش عارفة أقول

لحضرتك أد آيه.

وكيل النيابة: طب لما خطيبها راقى بالشكل ده

وكريم مهووس بحبها للدرجة دي... يبقى مين

اللي قتلها؟!

سهيلة (باكية): مش عارفة أنا هتجنن من

ساعة اللي حصل.

بعد شهادة سهيلة عاد الرائد أحمد والنقيب
مُهيّب إلى كريم في منزله ليعيد عليهم ما رآه يوم
الحادث...

الرائد أحمد: وريني الحكاية زي مشوفتها يومها
يا كريم.

بعد أن روى كريم القصة من جديد وهو يشير
لهم على جهاز الحاسب الآلي الخاص به...
النقيب مُهيّب: بس كده تبقى إنت شهدت غلط.

كريم (مُندهشاً): إزاي؟
النقيب مُهيّب: شاشة اللاب بتاعك في الحالة
دي كانت زي المراية يعني اللي تشوفه فيها شمال
يبقى هو في الأصل يمين بالانعكاس.
الرائد أحمد: مين اللي في اليمين بالنسباك يا
كريم؟

كريم (مُصاباً بصدمة): سهيلة!!
النقيب مُهيّب: متهيّالي يا بشمهندس إنت كده
محتاج تراجع الدكتور بتاعك في موضوع التركيز
ده بدل ما كنت هتجيب لبريء إعدام.
كريم: وكتاب الله أنا مبقتش أهلوس خلاص.
الرائد أحمد: يمكن نحتاجك تاني للشهادة في أي
وقت يا بشمهندس.

كريم: تحت أمر حضرتك.
انهار كريم من جديد بعد رحيل ضابطي المباحث

من منزله واستدعت حالته أن يعود للمشفى من جديد ليبقى تحت الملاحظة للاطمئنان على حالته، ولكن بعد وضعه تحت الملاحظة جاء تقرير المشفى بأن حالته أصبحت مستقرة وأنه لا يعاني من أي هلاوس.



الفصل السابع



مَتْلَهُمْ جَدِيد

عندما استدعت النيابة أسرة كريم للشهادة فيما يخص علاقته بها وذلك أثناء تواجده في المشفى في فترة الملاحظة...

وكيل النيابة: أستاذ عبد الغفار بـ يتهم ابنك إن هو اللي قتل سها بنته.
بثينة (والدة كريم باكينة): ابني أغلب من الغلب والدنيا حطت عليه بالجامد قوي
وكيل النيابة: عشان كده طلع غلبه في سها وقتلها؟!!

بثينة: مستحيل ابني يعمل حاجة زي دي...
ومش عشان ابني وربنا... إنما أنا عمري ما شوفت واحد بيحب واحدة زي ماكان كريم بيحب سها الله يرحمها... منهم لله ولاد الحرام اللي غاوه وسحبوه للطريق الوحش.

وكيل النيابة: كريم مبقاش طبيعي من بعد إيمانه للترامبول وده ممكن يكون خلاه قتلها في لحظة هلوسة.

بثينة (منهمرة في البكاء): والله العظيم ابني كان خف وبقي زي الفل... الوقت اللي قال إنه قام من قدام اللاب عشان يعمل حاجة كان بيساعدني

في شغل البيت لإني كنت واقعة على رجلي ومش
قادرة أتحرك... وأخته كان عندها امتحان
ومرضيش يخليها تسيب مذاكرتها وتساعدني...
فقام هو خلص شغل البيت بدالي ورجع قعد على
سريره عشان يرتاح من المجهود اللي عمله بس
اتكسف يقول كده في التحقيقات... ابني حنين قوي
وربنا.

وكيل النيابة لإيمان أخت كريم: تفتكرى كريم
يكون هو اللي قتلها؟
إيمان: لأ طبعاً مستحيل... أخويا ده قلبه رُهيف
طول عمره وده سبب بلوته من الأول خالص.
وكيل النيابة: إزاي؟!

إيمان: والدنا متوفي وأختي الكبيرة رجاء كانت
متجوزة قبل بابا الله يرحمه ما يموت، كانت كارهة
جوزها بس مش قادرة تتكلم طول ما بابا كان
عايش عشان كان صاحب مرض وخافت يتقهر لما
تطلق.

وكيل النيابة: وبعدين؟
إيمان: بعد بابا ما مات،
وكيل النيابة: الله يرحمه... حصل أيه؟
إيمان: ما أنا بحكي لحضرتك أهو... رجاء أختي
طلبت الطلاق وجوزها على أد ما كان حيوان معاها
في معاملته اليومية بس كان بيحبها بجنون...
فحبسها في البيت ومنعنا من بعض... عاملها

معاملة غير آدمية من إهانات وشتائم وضرب
وهدها إنها لو خرجت من بيته هيحرمها من
ولادها.

وكيل النيابة: مش من حقه.

إيمان: قالها هيثبت بشهود من عنده إنها غير
صالحة لرعاية الأولاد وكده تسقط حضانتها لولادها
وحضانة ماما كمان كجدة ليهم... وهي نقطة ضعفها
الوحيدة الولاد.

وكيل النيابة: وده كان سبب بلوة أخوكي إزاي؟
إيمان: حالتها كانت بتسوء يوم بعد يوم وكريم
حاسس إنه مكتنف مش عارف ينفذها وهو راجلنا
دلوقتي من بعد بابا الله يرحمه.

وكيل النيابة: هو اتعاطى الترامادول للسبب ده؟
إيمان: أيوه... ضغطه كان على طول عالي
بسبب الموضوع ده وكان بيشتكي من صداع
مزمن طول الوقت... ولاد الحرام دخلوله من
السكة دي.

وكيل النيابة: وهو كده عرف يساعدها؟!
إيمان: بالعكس... بعد ما جوز أختي عرف اللي
حصله بقى بيهددها أكثر بفرصة فوزّه بالولاد لو
فكرت تخلعه بعد مافرض الطلاق لإن عيلتها كلها
بقت غير أمينة على مستقبل الولاد.

وكيل النيابة: تقتكري لو مش كريم هو اللي
عملها... يبقى مين؟

إيمان (مرتبكة): شادي.

وكيل النيابة: شادي مين؟
إيمان: صاحب أمير أخويا الصغير... معاه في المدرسة.

وكيل النيابة: طالب في ثانوية عامة هيعمل كده ليه؟ وأيه علاقته بيها أصلاً؟!
إيمان: أنا هفهم حضرتك بالراحة.
وكيل النيابة: أتفضل.

إيمان: كريم لما دخل المستشفى... شادي كان بيعجى البيت عندنا يزور أمير وكان بياخذه أوضة كريم عشان يستعملوا اللاب بتاعه، وفي مرة وأنا على باب الأوضة دخلهم بالعصير سمعت أمير بيقوله...

"الله يخرب بيتك هتودينا في داهية!! أيه اللي إنت بتعمله ده؟"

شادي: أخذت الصور بتاعة القمر دي كوبي.
أمير: بس كده عيب إنت ناسي إنها كانت خطيبة أخويا!!

شادي: شوفت إنت قولت أيه!! كانت...
كااااااااااااااااا أنت

أمير: بس ده ميديكش الحق إنك تاخد صورها من عنده.

شادي: وهو أنا هعمل بيهم أيه يعني؟! أنا واخدهم عشان كل ماتوحشني أبص على صورها وأشبع منها شوية.

أمير: إنت كداب... إنت هتلعب بالصور دي.

شادي: شوية لعب للتسلية والشقاوة ميصروش

حد
أمير: مش صحيح... أنا واثق إنك هتبتزها
بالصور دي بعد ما تعمل فيهم حاجات تادي
سمعتها وتبتزها بعد كده زي ما بتعمل مع كل بنت
بتعجبك دايماً.

شادي: طب ولما انت عارف بتسأل ليه؟! يا
ميرو يا حبيبي دايماً أقولك " العلم اللي يتعبك
بناقصه... كتر التفكير بي فجر الدماغ مش بيوسعها

أمير: ودي هتبتزها فين إن شاء الله في سخان
بيتهم وألا البوتاجاز؟!
شادي: لا يا ظريف في تليفون بيتهم.

وكيل النيابة: قصدك يكون استغل غياب أهلها
وظلعلها البيت يهددها؟
إيمان: ممكن.

وكيل النيابة: طب وهدخله أساساً من باب
الشقة ليه؟!
إيمان: شادي جعجاع وصوته عالي وأكيد ورأها

الصور اللي مقبركها وهددها فاستصغرتة عشان
سنه وقالت طايش وممكن الكلام معاه بالراحة
يجيب نتيجة ويرجع عن آذاها.

وكيل النيابة: تدخله عشان خافت من صوته
العالي وقالت هتضحك عليه بكلمتين عشان صغير
جايز... إنما لحد أوضة النوم!! مش شايقة إن ده

فرض بعيد شوية؟!
إيمان: مش عارفة... يمكن هددها بسلاح أو
سكينة... حضرتك استدعيه هنا واسأله.
و بنفتيش بيت شادي تم العثور على صور سها
على جهاز الحاسب الآلي الخاص به وكذلك على
هاتفه المحمول...
الرائد أحمد: الصور دي بتعمل عندك أيه يا
شادي؟

شادي: عادي... دي صور عادية ممكن تلاقيها
حضرتك عند أي حد من أصحابها.
النقيب مُهيب: تقدر تثبت كنت فين وقت وقوع
الجريمة؟
شادي: كنت بتمشى في وسط البلد بعد ما
خلصت درس الفرنش.
الرائد أحمد: لوحدك؟
شادي: أه.

النقيب مُهيب: ليه؟
شادي: اتخانقت مع صاحبي بعد الدرس
ومرضيتش أرواح البيت وأنا مخنوق ف قولت
أتمشى شوية الأول أفك زهق وبعدين أرواح البيت،
وبالطبع لم يستطع شادي إثبات دليل قاطع على
عدم ارتكابه للجريمة مع توافر صورها لديه مما
جعل النيابة تأمر بأخذ بصماته وحبسه أربعة أيام
على ذمة التحقيق والتجديد في الميعاد مع مراعاة

أنه لازال قاصراً حتى لا يتم احتجازه مع
المُخْضَرَمِينَ من المجرمين.



الفصل الثامن

حادثة جديد



أما على جانب آخر من التحقيقات في مقتل سها فلقد ذهبت سناء إلى مروان في شركته السياحية...

مروان: أهلاً أهلاً بـ ست الكل خطوة عزيزة.
سناء (في حالة شديدة من الضيق): مبتردش على فوناتي ليه يا مروان؟
مروان: حبيبة قلبي مالها داخلة حامية عليا كده ليه بس؟!!

سناء (منفعلة): بقولك أيه... برود الفلاحين بتاعك ده أنا מבجبهوش ف ماتنرفزنش أكثر ما أنا متنرفذة.

مروان: ولما إنت مش بتحببيه أمال إتجوزتيني ليه وإنت عارفة من الأول إن أنا فلاح؟!
سناء: طب الحمد لله إنك لسه فاكّر إنك جوزي!!
والله كنت خايفة تكون نسيت الحكاية دي.
مروان: وليه كلام التقطيم ده وإنت عارفة اللي فيها؟!!

سناء: أه وعارفة كمان إن أنت إمبارح كنت مع صبايك بتلعب قمار وعشان كده مكنتش معبرني طول الليل وأنا عمالة أتصل بيبك.
مروان: يعني أرد عليك وأنا معايا ناس ويعرفوا

سرنا!!
سناء: لأ متردش وأولع أنا لو كنت بموت وبستجد بيك.

مروان: تموتي أيه يا قلبي!! ما أنت واقفة قدامي زي الفل أهو.
سناء: ده ردك اللي إنت مجهزه عشان ترد بيه عليا؟!

مروان: لا حول ولا قوة إلا بالله!! يعني إنت عايزة أيه دلوقتي بالظبط؟ أطلع الطنبجة أطخ نفسي عيار في دماغي عشان ترتاحي؟!
سناء: لا... عايزاك تطلع ورقة العرفي بتاعتنا وتقطعها وأنا كمان هعمل زيك.

مروان (مُندهشاً): بالسهولة دي هنسيب بعض عشان مردتش عليك لَمَّا اتصلتي عليا!! افرضي كان عندي ظرف طارئ منعني من الرد عليك.

سناء: وإفرض أنا في مصيبة وبستجد بيك ومش لقياك أعمل أيه؟! ولما أعرف إنك مردتش عليا عشان كنت بتلعب قمار مع صحابك فوق سطوح بيتكم أعمل أيه؟! ولَمَّا آجي أقولك زعلانة تقوم قالب الترابيزة عليا ومركبني الغلط أعمل أيه؟! لما بنتي حرارتها ترتفع وتوصل لدرجة الحمى في نص الليل ومش لقياك تلحقني أعمل أيه؟!

مروان: مطلبتيش دكتورها ليه؟!

سناء: ياااااااااااااااااااا... تصدق شكلي جبالك
النهاردة عشان تنصحنى النصيحة الذهبية دي!!
مروان: تعرفي تتكلمي بطريقة محترمة عن كده
شوية؟

سناء: محترمة!! لما تقولي دخلي الدكتور البيت
وش الفجر يبقى كده كلامك إنت اللي محترم!!
مروان: كنتي هتدخلي حد من أفراد أمن العمارة
معاه عندك.

سناء: أه ويبقى دحلت راجلين بدل مادحلت
راجل.

مروان: أمال اتصرفتي إزاي لَمَّا رأيي مش
عاجبك؟

سناء: كلمت مؤمن.

مروان: طليقتك؟!!

سناء: أبو ولادي اللي جيه على ملا وشه أول
ماعرف إن البنيت تعبانة بعد ماراح للدكتور جابه
من بيته عشان فون الدكتور كان مقفول.

مروان: جيبتي مؤمن عندك؟!!

سناء: يعنى أسيب بنتي تموت وإنت مش
فاضيلي!!

مروان: أه أنا مش فاضيلك فتجيبني اللي
فاضيلك ورهن إشارة منك عشان ترجعوا لبعض...
وطبعاً عشان كده إنت جاية تقطعي ورقة العرفي

دلوقتي بعد ما أحلو في عنيك من جديد بعد شهامة
امبارح وأولع أنا.

سناء: بلاش قلة أدب واحترم نفسك... أنا مش
قطعة في الشارع عشان أقضيها مع اللي ألاقيه
فاضيلي يا محترم وإلا اتجوزتني ليه وإنت عارف
إن أخلاقي واطية قوي كده.
مروان: كان نفسي فيك.

سناء: ودلوقتي؟!!

مروان: مبحبش أكل من طبق حد بصلي فيه.

سناء: يعني أيه؟

مروان: يعني إنت طالق وورقتك تتقطع حالاً يا
مدام.

سناء (مصدومة): كائك كنت مستنيها ومصدقت
إني أطلبها!! رخيصة قوي عندك أنا بالشكل ده؟!
مروان: إنت اللي طلبتي وأنا مفرضش نفسي
على حد مش مالي عينه.

سناء: مين قال إنك مش مالي عيني؟!!

مروان: لَمَّا مبقاش الضهر والسند وقت
متحتاجيني... أبقى كده راجل قدامك؟! لَمَّا تنبهري
بشهامة طليقتك في الوقت اللي مكنتش فاضيلك فيه
عشان بلعب شوية مع صحابي أفك بيهم عن نفسي
بدل ما أنهار من الاكتئاب والقلق اللي عايش فيه
اليومين دول وأنا محروم منك... أبقى كده مالي

عنيك؟؟؟

سناء: أنا....

مروان: إنت طالق وإتكلي على الله من هنا خلاص.

سناء (لا تستوعب مدى رخصها عنده): إنت للدرجادي بايع!!

مروان (بسخرية): ياااااااااااااااااه... أيه اللت والعجن الكثير ده؟! إنت أصولك من الفلاحين وأنا معرفش يا هانم يا بنت الأعيان والبشوات وألا أيه!!

سناء: ماشي يا مروان... إنت صحيح طلققتني وقطعت ورقة جوازنا خلاص... بس ورقتي أنا لسه معايا.

مروان: هتعملي بيها أيه يعني؟! هتطلبيني في بيت الطاعة مثلاً!!

سناء: لأ هطلبك في بيت أبوك العمدة عشان يعرف إنت واطي أد أيه وتعمل أيه مع بنات الناس بعد ماتزهق منهم.

مروان: وهتعرفي بيت أبويا العمدة منين إن شاء الله!! أعلى ما في خيلك اركبيه يا قطة.

سناء: أنا مش قطة ولا أنت واخدني من الشارع يا أستاذ مروان... والخيل ده بقي نبقى نركبه سوا في اسطبل أبوك العمدة في البلد زي ما كنت معشمني بانك هتركبهولي يوم ماتبقى راجل

وتعرف تواجه أبوك بجوازنا.
مروان (مُقْتَرِبًا مِنْهَا): أنا راجل غصب عنك
وعن عيلتك كلها.

وانهال مروان عليها بالضرب المبرح والذي تم
نقلها على أثره إلى غرفة الرعاية المُشددة بإحدى
المستشفيات وهي مصابة بارتجاج في المخ، و
قامت المستشفى بتبليغ الشرطة وكذلك تم تبليغ
أهلها وبالطبع عِلْمُ مؤمن بما حدث لها، وكما كانت
متوقعة وخائفة منذ البداية فقد أقام مؤمن فور
شفائها قضية ضم الأطفال لحضائنه لزوجها من
مروان حيث ورقة الزواج العرفي الخاصة بها
كانت لاتزال معها في حقيبتها وقت وقوع الحادث.

وعِلْمُ العمدة بما جرى لولده مروان فجاء من
البلدة ليتابع الموقف عن قرب ويحاول مع سناء
أن تتنازل عن المحضر الذي حررته ضد مروان
بالتعرض لها بالضرب بعدما علمت بأنه أصبح
السبب في فقدانها لحضائنه أطفالها...

علي: يا مدام سناء أنا همسك القضية اللي
مؤمن طليقك رافعها ضدك بضم الأطفال.

سناء: إنت فاهم كويس إن ورقة العرفي... اللي
أخدها من شنطتي لَمَّا كنت في المستشفى وفهم
الحكاية وعرف كنت بعمل أية عند مروان في
مكتبه... هتخليه يكسب القضية.

العمدة: أنا هخلي علي يتفاهم معاه واللي
 هيطلبه هياخده ويسيبلك الولاد.
 سناء: انت فاهم إن مؤمن ده حد تافه ممكن
 تشتريه بفلوسك... مؤمن ده ابن ناس أحسن منكم.
 العمدة: احترمي نفسك... دلوقتي أنا فهمت هو
 طلقك ليه من الأول ورمالك لكلاب السكك.
 سناء: اللي ابنك كلب منهم!!
 علي: يا مدام سناء احنا بنحاول نلم الموضوع
 مش نكسب عداوات جديدة.
 العمدة: لا جديدة ولا قديمة... خلاص يا علي...
 الكلام معاها كده وقف... ويمين عظيم غليظ لكون
 مطلع ابني من الحكاية دي صاغ سليم... يالا بينا.
 سناء: طول عمرك مستبد وظالم... منك لله يا
 شيخ... حسبني الله ونعم الوكيل.
 وبالطبع علم العمدة عندما حضر لمتابعة قضية
 مروان بأمر قضية سها وأن هناك اشتباه فيهم
 جميعاً أن القاتل بينهم وخاصة لؤي.



الفصل التاسع

كلمة الطب الشرعي



وجاء تقرير الطب الشرعي...
النقيب مُهيب: عرفت يا باشا تقرير الطب
الشرعي أيّه اللي جه فيه؟
الرائد أحمد: البصمات اللي تم رفعها من مكان
الجريمة ما اطابقتش مع بصمات أي حد من اللي
كانوا متواجدين وقت اكتشاف الجريمة ولا كريم
ولا الشباب ولا شادي ولا أمير.
النقيب مُهيب (مندهشاً): أيّه المفاجأة دي؟؟!!
يعنى حتى مجهودنا في جمع بصمات أمير
والشباب من غير ما نثير شكهم عشان محدش
فيهم ياخذ حذره لو له يد في حاجة... طارت في
الهوا!!

الرائد أحمد: خد دي بقى.
النقيب مُهيب: خير؟؟
الرائد أحمد: جه في التقرير إن ضوافر المجني
عليها تحتوي على أنسجة لجسم بشري
النقيب مُهيب: ده معناه إنها كانت بتقاوم القاتل
وقت خنقها وقامت بجرحه بضوافرها
الرائد أحمد: فيه حاجة أهم من كده بكتير.
النقيب مُهيب: خير يا باشا!!
الرائد أحمد: جه في التقرير بإنها مش عذراء.

النقيب مُهيب (مصدوماً): مستحيل!! ده باباها عامل عليها كماشة.
الرائد أحمد: الكلام ده حصل من وقت قريب لوقوع الحادث لأن جرحها اللي حصل وقت فض غشاء البكارة مكنش لحق يلتئم وقت الحادثة.
النقيب مُهيب: يعني اللي ارتكب الجريمة اغتصبها قبل ما يقتلها؟؟
الرائد أحمد: لا متعرضتش للاغتصاب وقت ارتكاب الجريمة... الحكاية دي كانت قبل ارتكاب الجريمة بساعات وكانت بالرضا مش بالغضب.
النقيب مُهيب (مستغرباً بشدة): تفكر حضرتك أيه اللي حصل له سها خلا حياتها اتقلبت كده ١٨٠ درجة من بنت مُجتهدة مُلتزمة لقتيلة فاقدة عذريتها؟؟

الرائد أحمد: بقالك أد أيه ملعبتش بازل؟
النقيب مُهيب: نعم حضرتك!!
الرائد أحمد: بازل... بازل مسمعتش عنها قبل كده!!

النقيب مُهيب: عارفها وكنت بحب ألعبها قوي وأنا صغير وكنت شاطر فيها ومكانتش بتاخذ معايا وقت.
الرائد أحمد: آخر قطعة بتحطها هي اللي بتكمل الصورة.

النقيب مُهيب (متعجباً من الحوار): تمام.
الرائد أحمد: بنبقى قدامك طول الوقت بس إنت مستبعتها لأن شكلها ميوحيش إن كلمة النهاية

متسطرة فيها

النقيب مُهيب: تمام برضه.

الرائد أحمد: مين الشخصية اللي احنا استبعدناها من التحقيقات لحد دلوقتي؟

النقيب مُهيب (بدون تردد): مامتها لأنها تعبانة من ساعة اللي حصل ومن قبل الحادثة كمان.

الرائد أحمد: بمعنى؟

النقيب مُهيب: وهي وجوزها مسافرين البلد جاتلها الأزمة في السكة وكانت ناسية العلاج في البيت... وطبعاً لأن جوزها بخيل فمرضيش يجيبلها علاج جديد وكانوا لسه قريبين من البيت... فرجع بسرعة جابلها علاجها ونزل ثاني جري علشان يلحقوا الفطر بدل التذاكر متروح عليهم... فلما عرفت الخبر وهي في البلد تعبت زيادة... لما رجعت هنا دخلت العناية المركزة واتعملها قسطرة قلب.

الرائد أحمد: بقت كويسة دلوقتي؟

النقيب مُهيب: لسه طالعة من العناية من

يومين.

الرائد أحمد: يبقى زيارتها واجب.

النقيب مُهيب: حضرتك صاحب واجب طول

عمرِك... بس أيه علاقتها باللي احنا كنا بنقوله دلوقتي؟!

الرائد أحمد: آخر قطعة بازل أكيد عندها.

النقيب مُهيب: نعم؟!

الرائد أحمد: لما يبقى الأب بالقسوة والشدة دي

ومع ذلك البنت متفوقة وسلوك باباها مش مقصّر
 علي نفسييتها ف ده معناه إن فيه أم صالحة
 محوطة علي بنتها وبتراعيها وفي حالة زي دي
 أكيد البنت مش بتخبي علي مامتها أي حاجة.
 النقيب مُهيب: إلا أنها تقول لمامتها إنها غلطت
 مع واحد... ده غير إن واحدة شخصيتها اتحولت
 بالشكل ده... يبقى منطقي إنها تبدأ تخبي علي
 مامتها ويكون ضميرها مرتاح كمان... وبعدين لو
 الحكاية مجرد ساعات... ف ده معناه إن الوقت
 اللي حصل فيه الكلام ده تقريباً الفجر... يبقى
 خرجت من بيتهم إمتي ورجعت إمتي؟!
 الرائد أحمد: مش شرط تكون غلطت مع واحد
 فعلياً.

النقيب مُهيب: إزاي؟!
 الرائد أحمد: هو أنت يا حضرة الظابط إيه
 علاقتك بالتكنولوجيا بالظبط؟
 النقيب مُهيب: عادية بس مش متابع من ساعة
 مشتغلت حضرتك.
 الرائد أحمد: كده يبقى فاتك كتير وحاول تلحق
 نفسك.
 النقيب مُهيب: طب حضرتك مش هتفهمني
 بتفكر في أيه بالظبط؟
 الرائد أحمد: لما أتكلم مع مامتها وأطابقه باللي
 في دماغي هبقى أقولك.



الفصل العاشر

شهادة الأم



الرائد أحمد: حمد لله على السلامة يا مدام فريدة والبقاء لله.

فريدة: الدوام لله حضرتك.

الرائد أحمد: كنت محتاج أعرف منك شوية حاجات عن سها ينتك الله يرحمها.

فريدة (باكية): لسه مش عارفة أقول الله يرحمها... مش مصدقة إن بنتي خلاص ماتت وبقي يتقال عليها الله يرحمها!!

النقيب مهيّب: حضرتك ست مؤمنة وموحدة بالله.

فريدة: لا إله إلا الله... تحت أمر حضراتكم.

الرائد أحمد: مين كانت صاحبة سها الأنتميم؟

فريدة: سهيلة جارتنا... بس ده لحد فترة قريبة.

الرائد أحمد: اتخانقوا بعد كده؟

فريدة: لأ بس لما سها اتخطبت ل لؤي وكان

شارط علينا إن الموضوع ده يبقى سر بينا...

اضطرت سها إنها تقصّر معاها عشان متبقاش

بتعامل معاها على غش.

الرائد أحمد: سهيلة قابلت الموقف ده إزاي؟

فريدة: سهيلة عارفة إن أهم حاجة عند سها هو

المذاكرة فلما سها قالتلها إنها عايزة تركز الفترة

الجاية في مذاكرتها عشان تعوّض فترة المشاكل
بتاعة كريم... سهيلة معترضتش وكانت بتتصل
بيها كل فترة على تليفون البيت تسلم وتقفّل على
طول.

الرائد أحمد: يعني محدش قالها حاجة على
موضوع الخطوبة ده أكيد؟!
فريدة: أيوه.

الرائد أحمد: سها مكانش عندها تليفون محمول
أو لاب أو تاب أو أي حاجة من الأجهزة دي؟
فريدة: لوي لما خطبها جابلها تاب هدية وهو
اللي كان بيضحكها بالرصيد كل شوية.

الرائد أحمد: باباها كان عارف الموضوع ده؟!
فريدة: أيوه... وقتها لوي أقنعه إن ده ضروري
عشان ياخدوا على بعض مادام مش عارفين
يتقابلوا لا جوه البيت ولا بره.

الرائد أحمد: كنتي بتقеди معاها وهي بتكلمه؟
فريدة: لأ كانت بتتكلم معاها وهي لوحدها... ده
في الأول وفي الآخر بيتكلموا من بعيد لبعيد يعني
مش قاعدة معاها عشان أخاف يحصل بينهم حاجة
غلط لا سمح الله مع إني عارفة بنتي متربية إزاي.
الرائد أحمد: ولما كانت مخطوبة لكريم... كانوا
بيقعدوا لوحدهم وألا معاكم؟

فريدة: كان مكتوب كتابهم يعني كانت مراته ف
كنا بنسيبهم لوحدهم عادي.

الرائد أحمد: محدش قال حكاية كتب الكتاب دي قبل كده.

فريدة: ما هو كان كتب كتاب بس... وبعدين هي خلعتة بعد موضوع الترامادول.

الرائد أحمد: باباها كان حارمها من المصروف بخل وألا كان بيخاف عليها إن الفلوس تتلف أخلاقها؟

فريدة: أنا بنتي متربية كويسة ومهما مسكت من فلوس فعملها ما تهتلف أخلاقها.
الرائد أحمد: تمام.

بعد انتهاء تلك المقابلة تم تحرير التاب الخاص بسها والعمل على فض محتوياته، كما أمرت النيابة باستدعاء كل من كريم ولؤي وسهيلة وأستاذ عبد الغفار في وقت واحد للشهادة من جديد فتواجد الجميع في سراي النيابة...

كريم: أنا عايزك تعرف بس يا عمي إني والله العظيم ما قتلت سها ولا كنت أجرو أعمل حاجة زي دي.

لؤي (بتهمك): قالوا للحرامي أحلف.
كريم (موجه الكلام لؤي): أنا مش فاهم انت بقيت بتكرهني كده ليه!! المفروض أنا اللي أكرهك... انت اللي استغليت فترة تعبى وروحى خطبت خطيبتي اللي كنت بعشق التراب اللي بتمشي عليه وانت شاهد على حبي ليه من أول يوم... أنا

عمري ما خبيت عنك حاجة.
علي: مينفعش الكلام ده هنا يا شباب... بعد
إذنك يا كريم تروح تقف جنب المحامي بتاعك.
كريم: يا أستاذ علي أنا كنت عايزه يصدقني
بس!!

أستاذ عبد الغفار: خايف تتشنق؟!
كريم: ياريت... حتى أوصل عند سها بسهولة
عشان أوصل معاها اللي أقطع في الدنيا.
وفي داخل مكتب وكيل النيابة...
وكيل النيابة: عرفتني منين حكاية خطوبة سها
ولؤي؟

سهيلة: منها.
وكيل النيابة: مامتها قالت إن سها خبت عليكِ
وما قالتكيش؟
سهيلة: قالتلي بس كان سر بينا من ورا مامتها
وكيل النيابة: أنتِ قولتي قبل كده إن لؤي كان
بيكلمها على تليفونك وإنتِ عندها؟

سهيلة: أيوه.
وكيل النيابة: بس مامتها قالت كان عندها تاب
بنتكلم معاها منه.
سهيلة: قبل مايتقدم لها كان كلمها على فوني
عشان يعرف شعورها من ناحيته قبل مايتقدم
ويتكسف لو رفضته هي أو أهلها.
وكيل النيابة: وجاب رقم تليفونك منين؟
سهيلة: كنت بتدرب عنده في مكتبه.

وكيل النيابة: إنت لسه قايلة عرفتى موضوع الخطوبه منها ورجعتى قولتى كلمها على تليفونك قبل الخطوبه عشان يسمع منها موافقه والا لا... مش شايفه تعارض فى الكلام ده!!

سهيلة (مرتبكة): لا أبداً خالص... هو كلمها من عندي يعرف رأيها وقالتله هفكر... بعد كده سكت وأنا أتكسفت أسأله لأن علاقتى بيه مكانتش قوية للكلام فى الأمور الشخصية دي يعنى... هو طلب خدمة وأنا عملتها وبس... بعد كده هي اللي قالتلى من نفسها.

وكيل النيابة: طب مسألتيهاش هي ليه بعد ماكلها من عندك؟ طبعي البنات بيبقوا شغوفين جداً يتابعوا الأحداث أول بأول فى المواضيع اللي زي دي!!

سهيلة: أنا بطبعي مش حشرية... بسببها تحكي براحتها وقت ماتحب وأنا عارفة إنها فى الآخر مستحيل تخبي عني أي حاجة.

وكيل النيابة: لما هي كان عندها تاب وتليفون أرضي أمال كنتوا بتتكلموا من البلكونة ليه؟

سهيلة: التاب كانت بتستعمله ل لوي بس عشان هو اللي دافع حقه فكانت بتخاف تستعمله كثير عشان ميبوظش... والتليفون الأرضي عندي كان بايظ وأنا اللي بطلبها عشان باباها مخليه عندهم استقبال بس ومكانش معايا رصيد موبايل أكلها

منه على الأرضي... ف كنا عاملين الميعاد ده ثابت
نتكلم فيه من البلكونات في الطوارئ اللي زي دي.
وكيل النيابة: ما طلبتش منك تروحي تقعدى
معاها بدل ماتقعد لوحدها؟
سهيلة: لأ هي من ساعة ماتخطبت اتفقت معايا
نقلل مقابلات في البيت عندها عشان تركز في
مذاكرتها في الوقت اللي مش بتتكلم فيه مع لؤي.
وكيل النيابة: كانت بتتكلم معاه على التليفون
بس؟

سهيلة: وفاير وواتس وماسنجر وكل حاجة.
وكيل النيابة: على اعتبار إنك صاحبته وسرها
قوي كده... حصل بينها هي ولؤي أو حتي بينها
وبين كريم أي علاقة خاصة؟
سهيلة (مرتبكة مرة أخرى): معرفش... احنا
كنا بنتكلم في كل حاجة إلا الموضوع ده.
وكيل النيابة: ليه؟

سهيلة: دي أسرار ودايمًا يقولوا اللي بين
الراجل ومراته زي اللي بين الميت والقبر محدش
يعلمه إلا الله

وكيل النيابة: ونعم بالله... بس هي كانت مكتوب
كتابها مرة ومخطوبة مرة... يعني مكنش فيه
جواز فعلي في المرتين عشان تقولي كلمة الراجل
ومراته!!

سهيلة (لا تعرف كيف ترد): برضه... حتى لو

مجرد علاقة ارتباط فهي برضه حاجة خاصة مقدرش
أُتدخل فيها.

وكيل النيابة: إنتِ مخطوبة؟

سهيلة: لأ.

وكيل النيابة: مكنتيش بتزعلي إن سها العرسان
رايحين جايين عليها وكمان بياخدوك واسطة ليها
في حين إن محدش فيهم فكر فيك إنتِ؟
سهيلة: الحب والجواز رزق حضرتك زي الأكل
والشرب والصحة والذرية.

وكيل النيابة: سهيلة كانت تعرف خبر خطوبتك
إنتِ وسها؟

لؤي: أيوه.

وكيل النيابة: من مين؟

لؤي: مني.

وكيل النيابة: قبل الخطوبة وألا بعدها؟

لؤي: قبل الخطوبة... هي اللي كانت واسطة
بيني وبينهم... فلما بلغوني بالموافقة قولت لها.

وكيل النيابة: إنتِ وسهيلة كنتم تعرفوا بعض
من قبل كده وألا ده كان أول تعامل بينكم؟

لؤي: سهيلة طالبة في فنون جميلة ومن ساعة
ما دخلت الكلية جاتلي المكتب وطلبت مني تشتغل
معها عشان تكسب خبرة جنب الدراسة وأنا مكنش
عندي مانع في ده... أنا بحب الإنسان الطموح.

وكيل النيابة: مفكرتش تخطب سهيلة بدل سها؟
لؤي: فكرت بس لقيت شخصيتها مش متوافقة
مع شخصيتي.
وكيل النيابة: طب هي حبتك؟
لؤي: دي حاجة تخصها... المهم مشاعري أنا
كانت رايحة فين.
وكيل النيابة: إنت وسها كنتوا بتحبوا بعض؟
لؤي: جداً.
وكيل النيابة: حصل بينكم أي علاقة خاصة في
فترة الخطوبة؟
لؤي: احنا مكناش بنتقابل أساساً.
وكيل النيابة: ولا على أنت؟
لؤي (مصدوماً من السؤال): ده شغل مراقبين
وأنا أكبر من كده.

وكيل النيابة: إنت ولؤي أصحاب؟
كريم: كنا.
وكيل النيابة: وبعدين؟
كريم: بعد ما أدمنت الترامادول بعد عني بحجة
أنه خايف من عمه العمدة يعرف إنه مصاحب واحد
مدمن.
وكيل النيابة: هو كان بيخاف من العمدة قوي
كده؟
كريم: ولا أي خوف... لؤي مبيخافش من حد...

واحد مُلحد مبيخافش من اللي خلقه والعيادُ بالله...
هيخاف من عمه إزاي!!
وكيل النيابة: مين اللي قالك إنه مُلحد؟
كريم: هو... احنا كنا أصحاب أنْتيم.
وكيل النيابة: أَمَّا تفكر بعد عنك ليه في
محنتك؟

كريم: وقتها مكنتش مركزِ عشان أدور على
السبب الحقيقي بس حالياً طبعاً فهمت.

وكيل النيابة: فهمت أيه؟
كريم: كان مصاحبني على غش من الأول
خالص... أحكيه عن حبي لـ سها فيحبها هو...
أتعب أنا يروح يخطبها هو.

وكيل النيابة: عرفت إنه خطبها إمتى؟
كريم: بعد ما اتقتلت الله يرحمها زي كل الناس
ما عرفت لما باباها قال.

وكيل النيابة: تعرف أيه عن علاقتها بسهيلة؟
كريم: سهيلة طول عمرها بتغير من سها... بس
سها كانت بتكبر دماغها عشان معندهاش إخوات
فكانت واخداها أخت ليها.

وكيل النيابة: سهيلة قالت إنها كانت متعوّدة
تشاورلها من البلكونة في ميعاد يومي... وأكيد
كونك متابعتها من الشباك بصفة مستمرة... تبقى
كنت عارف كده كويس.

كريم: مش صحيح... كان بقالهم فترة طويلة

ما عملوش كده... بحسبة صغيرة هيبقى من وقت
ما سها اتخطبت... وبعدين يومها لما شوفتها
بتشاور على شاشة الابلاب... طلعت الشباك بس
مشوفتش سهيلة واقفة في بلكونتها.
وكيل النيابة: يمكن عشان أنت بصيت على الجنب
التاني ناحية شقة الشباب حسب تفكيرك مافرض
وقتها!!

كريم: جايـز.
وكيل النيابة: وانت وسها لما كنتم مخطوبين
كانت في حكم مراتك... حصل أي حاجة خاصة
بينكم؟

كريم: لأ طبعاً... أنا عندي إخوات بنات وربنا
يستر على ولايانا... لو عملت معاها حاجة في
السر هتتردلي في أخواتي.
وكيل النيابة: طب هي كان عندها استعداد تعمل
ده لو أنت كنت طلبته منها؟

كريم: سها بنت زي الجنيه الذهب
وكيل النيابة: بس الطب الشرعي أثبت إنها عند
وفاتها مكانتش عذراء... وانت أقرب حد يكون
السبب في ده.

كريم (منفعلاً): ورحمة أبويا ما حصل بينا أي
حاجة من الكلام ده خالص... وبعدين ممكن يكون
القاتل اغتصبها قبل ما يقتلها أو حتى بعد ماقتلها.
وكيل النيابة: أيه اللي خلاك تقول بعد ماقتلها

دي؟!
كريم: لأن سها مستحيل توافق بحاجة زي دي
حتى لو بموتها فأغلب الظن يبقى ده اللي حصل.

وكيل النيابة: إنت رجعت البيت يوم الحادثة
تجيب علاج المدام؟
أستاذ عبد الغفار: أيوه.
وكيل النيابة: كانت سها كويسة وألا كان باين
عليها إنها متغيرة؟
أستاذ عبد الغفار: كانت قاعدة بتذاكر.
وكيل النيابة: إنت عارف إن لوي كان جايلها
تاب؟

أستاذ عبد الغفار: أيوه.
وكيل النيابة: بيتقال إنك شديد معاها ومانعها
من الاختلاط يبقى إزاي سمحتها تستعمل التاب
ده؟

أستاذ عبد الغفار (مستكراً): ده خطيبها وداخل
البيت من بابيه وبعدين ده عشان يتعرفوا على بعض
من خلاله مش أكثر زيه زي التليفون... يعني
مسبتهاش معاه في أوضة لوحدهم وقفلت عليهم
ومشيت لا سمح الله.
وكيل النيابة: تفتكر عملت معاه حاجة على أنت
هي السبب في فقدها عذريتها؟
أستاذ عبد الغفار (منهاراً): مستحيل بنتي تكون

عملت حاجة زي دي ... أكيد اللي قتلها هو اللي اغتصبها ... بنتي مستحيل تعمل كده ... مستحيل. وكيل النيابة: بس غشاء بكارتها تم فضه باليد. أستاذ عبد الغفار: يعني أيه؟ وكيل النيابة: يعني لو اللي قتلها هو اللي عمل كده يبقى جاي ينتقم منها أو تكون حضرتك شخصياً أديته في حاجة كبيرة زي دي قبل كده. أستاذ عبد الغفار: يشهد عليا ربنا إن عمري ما عرفت واحدة ست غير الست أم سها. أمر وكيل النيابة بتحويل كريم ولؤي وسهيلة وأستاذ عبد الغفار للطب الشرعي للكشف الطبي عليهم وأخذ عينه من نسيج بشرتهم لمضاهاتها بالأنسجة المتواجدة في أطافر سها وقت وقوع الحادث...

عمر: طب سهيلة ممكن تكون غارت منها وكانت خناقة بنات ... لؤي ممكن يكون طمع في جمالها وشبابها وحاول يرأودها عن نفسها فكانت بتدافع عن نفسها ... كريم ممكن كان عايز ينتقم منها ... إنما باباها أستاذ عبد الغفار النيابة تشك فيه ليه؟؟

علي: وكيل النيابة بيشك إن باباها لما رجع البيت لقأها في وضع مشين وده استفزده وخلاه يخرج عن صوابه لحد ملقأها ميتة بين أيديه.

كما تم تحرير جهاز الحاسب الآلي الخاص بكل
من لوئي وكريم وسهيلة وتفريغ محتويات هذه
الأجهزة، وكذلك العودة لشبكات المحمول الثلاثة
لمتابعة مكالماتهم في الفترة الأخيرة، وأيضاً رصد
كل المكالمات الواردة للهاتف الأرضي في منزل
سها وجبس كلاً من كريم ولوئي وأستاذ عبد الغفار
أربعة أيام على ذمة التحقيق.



الفصل الحادى عشر



قرارات العمدة

العمدة: يعنى لؤي كده بقى مُتهم؟
علي: أبوه يا حاج.
العمدة: يبقى إنت لازم تدافع عنه.
علي: هو لسه مُتهم ومُبتَش عليه حاجة.
العمدة: وإنت لسه هتستنى لما يثبت عليه حاجة؟

مروان: يا علي... لؤي لو عدّى من قضية القتل فقضية فض غشاء بكارتها موجودة.
مراد: لسه برضه مُبتَش عليه... وحتى لو ثبتت فاللي اتفض غشائها ماتت خلاص.
مروان: لسه أبوها موجود والبنت كانت لسه قاصر ماجابتش ٢١ سنة.
عمر: أنتوا ناسيين إن علي هو المحامي بتاع أسرة سها الله يرحمها!!
علي: أستاذ عبد الغفار سحبها من مكتبي النهاردة الصبح.

مروان: بيْفهم.
عمر: أكيد عشان يزيل الحرج عن علي.
العمدة: ولا حتى زعلان عشان بنته... هو بناتهم يعملوا الغلط بمزاجهم وييجوا يشيلونا احنا ذنبهم!!

عمر: يا حاج... سها الله يرحمها كانت حتة جوهرة

والله.
العمدة: أَمَّا فَرَطْتُ فِي نَفْسِهَا بِالسَّهْوَةِ دِي
ازاي؟!

عمر: الله أعلم باللي جرى يا حاج... يعني ممكن
اللي قتلها يكون هو اللي فضه قبل ما يقتلها أو حتى
بعد ما قتلها.

علي: استعجال اللي قتلها في النزول يبين إنه
قتلها غلط أصلاً أو مضطر بعد مشادة كلامية
حصلت بينهم مثلاً... وده معناه إنه ملحقش يعمل
أكثر من كده لا قبل قتلها ولا حتى بعده... ده غير
إن البنت كانت بكامل لبسها لما جيرانها دخلوا
عليها ومع فرضية استعجال القاتل فأكيد ملحقش
يعمل كده ويلبسها هدومها تاني... وكمان الطب
الشرعي أثبت إن الفض كان قبل القتل بساعات.

مراد: على كلامكم فواضح إن البنت هي اللي
فضته بنفسها أثناء جماع على النت من خلال
كاميرا وده بيحصل مع بنات كتير جداً اليومين دول
وييجوا العيادة بعد كده بيعيطوا.

عمر (مستأءاً): لا حول ولا قوة إلا بالله العلي
العظيم.

مروان: لو كده يبقى المشتبه فيه الأول هو لؤي
لأن هو اللي كان خطيبها في الوقت ده وهو اللي
جاييلها التاب وهو برضه الوحيد اللي بتكلمه على
النت.

مراد (مُنفعلاً): الله يخرب بيوتكم... يعني أنا
ماشى بما يُرضي الله وإنتوا بتبوظوا سمعتي من
وراي!!

مروان: متاخدهاش على صدرك قوي كده.
مراد (غاضباً): أَمَّال أخدها إزاي دي؟!
ومكنتوش بتعملوا ريتاج بالمرة؟!

مروان: لا هو كانوا بيخلص نفسه من الحمل
وبس... وهما بعد كده يشيلوا هم أنفسهم... كان
بيقول هما اللي فرطوا بمزاجهم يبقى يستحملوا
نتيجة التفريط ده.

العمدة: بكرة يا علي تنزل تشوف ابن عمك
بصفتك المحامي بتاعه... أنا كده وكلتك معاه
خلاص.

علي: اللي تؤمر بيه يا حاج
مراد: مش هتقول لعمي معتر يا حاج عشان
ييجي من البلد يقف جنب ابنه؟

العمدة: خلاص كلمه يا مراد خليه يسيب
المستشفى هناك في البلد لأي دكتور ثقة شغال
عنده وييجي هو ويعمل حسابه يمكن المدة تطول
هنا شويه.

مراد: حاضر يا عمي.

الفصل الثاني عشر

عن القاتل؟!



دخل الرائد أحمد إلى مكتبه في الصباح بعدما أخذ أجازة استثنائية لمدة يوم لإجراء عملية جراحية لابنته؛ فجاء له على الفور النقيب مُهيب ليُبلّغه بنتيجة تقرير الطب الشرعي...
النقيب مُهيب: حمد الله على سلامة الأمور الصغيرة يا فندم.

الرائد أحمد: الله يسلمك.
النقيب مُهيب: تقرير الطب الشرعي ظهر ومش هتصدق حضرتك مين اللي قتلها.
الرائد أحمد: سهيلة.

النقيب مُهيب: وحضرتك عرفت منين؟
الرائد أحمد: كذبت... قالت إنها كانت الواسطة بين لؤي وسها من الأول خالص في حين إن والدتها سها أكدت إن بنتها بعدت عن سهيلة عشان متعرفهاش حاجة عن الخطوبة دي.
النقيب مُهيب: طب ما يمكن كانت سها ضاحكة على مامتها؟! وخصوصاً إن لؤي أكد كلامها بأنها كانت الواسطة مايبينهم.

الرائد أحمد: قال إنها عرفت منه قبل

الخطوبة... سهيلة نفسها قالت إنها عرفت من سها بعد الخطوبة لأن علاقتها ب لؤي مكانتش تسمح بأنها تتدخل في تفاصيله أكثر من كده.

النقيب مُهيب: قصد حضرتك أيه؟
الرائد أحمد: لؤي مسلمنا سهيلة تسليم أهالي والتقرير اللي في أيديك يقول إن كلامي صح... مضبوط!!

النقيب مُهيب: طول عمرك باشا... طب عارف مين اللي مارست معاه الزنا عبر الإنترنت؟
الرائد أحمد: لؤي.

النقيب مُهيب (مُعجَباً بفراسته): كانت واضحة ها!!

الرائد أحمد: كريم كان خاطبها ومع ذلك طول فترة الخطوبة مجاش جنبها وهي في حكم مراته... يبقى إزاي يعرف يقنعها إنها تعمل في نفسها حاجة زي دي بعد كل المشاكل اللي حصلت ما بينهم... وبعدين الموضوع ده عايز كاريزما عالية ماتتوفرش إلا في واحد زي لؤي.

النقيب مُهيب (مُنْبهراً بِذِكَاثِهِ): طب حضرتك عارف بقى سهيلة عملت كده ليه؟

الرائد أحمد: القتل حصل صباحية اللي عملته مع لؤي... يبقى أكيد الخناقة كانت عليه.

النقيب مُهيب: فعلاً ده اللي حصل... واضح إن مش سها لوحدها اللي لؤي ضحك عليها.

الرائد أحمد: عشان كده قولتلك مسلمهاننا تسليم أهالي... عشان يخلص منها هي كمان بالمرة.
النقيب مُهيب: كده هتتقدم قتل خطأ.
الرائد أحمد: فعلاً.

النقيب مُهيب: أبو سها وأبو سهيلة حلفوا إن لو المحكمة مجابتش حق بناتهم من لؤي... هما هيجيبوا حق بناتهم بنفسهم.
الرائد أحمد: اتفقوا مع بعض وهما خصمين في قضية واحدة!!

النقيب مُهيب: لأ يا فندم... كل واحد لوحده.
الرائد أحمد: كده يبقى هُدر دمه وتفرّق بين القبائل.

النقيب مُهيب: حقيقي يا فندم وخصوصاً إن النيابة أفرجت عنه النهاردة بكفالة لحين النظر في الدعاوي اللي أبو سها وأبو سهيلة قدموهم ضده.
الرائد أحمد: يعني لو فلت من المحكمة.
النقيب مُهيب: يبقى مش هيفلت من حد فيهم.
و بعد جلسات عديدة في المحكمة للنظر في دعاوي هتك العرض والتغريز بالفتيات...

معتز: أيه الأخبار يا ابني؟ طمني.
علي: دعوة أبو سها أترفضت بسبب وفاتها وزوال سبب الدعوة... ده غير إن مفيش دليل مادي زي تسجيل فيديو مثلاً يثبت إن لؤي عمل كده معاها... كل اللي متوفر شوية شات قبل

مايفتحوا الكاميرا... وأنا ربنا يسامحنى استغليت
النقطة دي لصالحه.

العمدة: أخذت الشر وراحت.

علي: دعوة والد سهيلة هي كمان اترفضت
لأنها مش قاصر... سهيلة كانت أكبر من سها
بشهور فرقت معانا... وكمان متوفرش أي دليل
مادي على إن هو اللي هتك عرضها سواء بالرضا
أو بالغصب... أما بالنسبة للجنيين فمستحملش كل
الضغط دا ومات في بطن أمه سهيلة وكده سقطت
قضية النسب برضة.

العمدة (مُبتَهجاً): راجل من ضره أبوك ياولا يا
أستاذ علي.

عمر: لا حول ولا قوة إلا بالله العلي العظيم.
خرج لؤي من كل القضايا الموجهة له شامخاً
مزهواً بنفسه فرحاً بها وفرحاً بعدالة القضاء،
ولكن هناك وجوه أخرى كثيرة للعدالة فهناك
العدالة الالهية وهناك عدالة من لم يجد حقه
بالقانون.

عاد لؤي لمنزله بصحبة والده وأعمامه...

فاضل: حمدالله على سلامتكم يا لؤي.

لؤي: الله يسلمك يا عمي.

معتز (حزيناً): كده برضة يا لؤي!! كل ده يطلع
منك!!

العمدة: هو كان ضرب أي واحدة منهم على

أبدها يعني!!
عمر: يعني إنت مش زعلان منه في أي حاجة
من اللي عملها يا حاج ولا إنه كان سبب حتى لو
مش مباشر في قتل واحدة والثانية بين الإعدام
والمؤبد!!

العمدة: وهو كان قالهم يعملوا في بعض كده!!
وبعدين اللي تفرط في عرضها تستاهل القتل من
أهلها أصلاً.

عمر: إنت دلوقتي تقدر تدافع عن سهيلة يا
علي بعد ما قضية خصومتها مع لؤي خلصت؟
العمدة (منزعجاً): أنت اتجننت في عقلك!! يدافع
أيه وزفت أيه!! مش كفاية كانوا عايزين يسجنوا ابن
عمك!!

مروان: يا حاج هو يقصد إن الخصومة خلصت
والحمد لله وكلنا عارفين إن لؤي كان السبب في
اللي حصل بين سها وسهيلة وده معناه إن أبو دي
أو دي هيحطوه في دماغهم... فلو علي دافع عن
سهيلة يبقى اتقيناً شر واحد فيهم على الأقل.

العمدة: وزودنا العداوة مع الثاني... وبعدين
أعلى ما في خيلهم يركبوه... احنا ابننا صاغ سليم.
معتز: معلش يا عمدة خلي علي يدافع عن
سهيلة حتى عشان ضميرنا يرتاح شوية من
ناحيتها... دي مهما حصل كانت حامل في حفيدي.
العمدة: أنت اتجننت يا دكتور!! مشافو هو مش

وهما بيسرقوا قام شافوهم وهما بيتحاسبوا!! يعني
في المحكمة قولنا لؤي مش أبو الواد وإنت جاي
تقول الكلام ده هنا دلوقتي!!

معتز: أنا بتكلم بينا وبين بعض يا عمدة.
العمدة: يمين عظيم غليظ اللي هيجيب سيرة إن
علي يدافع عن سهيلة دي تاني ليكون آخر يوم له
في العيلة كلها ويبقى يعيش لوحده من غير عزوة
بقي... شوف حتى اسمها من وصفها... سهيلة...
يعني سهلة كده لأي حد عايز يعمل معاها حاجة
مش معززة نفسها... وبعدين أمال لو مكانش ابنك
يا دكتور هو اللي بتكلم عليه!! مش ابنك ده
برضه يا دكتور!!

لؤي (منزعجاً): عن إذنكم أنا محتاج أروح
أرتاح شوية.

فاضل: ليه بس الكلمة الأخراية دي يا عمدة!!
ما أنت عارف إنها بتوجع لؤي.

العمدة: أنا بتكلم عادي ولا هو وأبوه على
راسهم بطحة ومش مستحملين الكلام!!

معتز (حزيناً بشدة): كده برضه يا عمدة لسه
اللي في دماغك زي ما هو بعد العمر ده كله!! أمال
لو مكانش الواد شبه جده الله يرحمه بالمللي!!

العمدة: بس أبويا العمدة الله يرحمه مكانش
شعره أصفر وعينه خضرة أوي كده.

مراد: دي جيناته من أمه يا حاج... بس وارث

جبنات الشكل من جدي الله يرحمه وده واضح أوي للكل.

العمدة: إنتوا سيبتوا المحكمة هناك وجايين تنصبو هالي هنا!! ما أنا طول عمري بقوله يا ابن الخواجية ومش بيتكلم!!

مروان: يا حاج كلنا عارفين إن كلامك ده بيزعله بس هو مؤدب ومش بيرضى يوريك إنه زعلان.

العمدة: آه... مؤدب... أمه مآدباه كويس... بأمرة اللي عمله مع بنات الناس!!

علي: سبحان الله يا حاج!! إنت مش لسه قاييل اللي هيفتح الموضوع ده تاني هتطرده بره العيلة!! معتز: بعد إذنك يا عمدة أنا اليومين الجايين دول لو مش محتاجين لوي في قضية سهيلة يبقى هأخذه ونروح عند أمه شوية.

العمدة: آيه!! حنيت يا دكتور!!

فاضل: معتز عنده حقه يا عمدة... الواد محتاج يرتاح ويقعد مع نفسه شوية يراجعها في اللي كان بيعمله... وفي الغالب هو محتاج علاج نفسي لفترة.

العمدة: جرى آيه أنت وهو!! إنتوا شوية تطلعوه معقد من كلمة بقولها وشوية تطلعوه مجنون!!

مروان: محدش مننا خالي يا حاج.

العمدة: والنبي تسكت إنت... مش كفاية القضية
اللي عملها لك طليقتك واحنا عمالين نماطل فيها
لحد مانقتعها بالمصالحة.
معتز: جَوَزْهم لبعض شرعي والحكاية تخلص يا
عمدة.

العمدة: أَجَوَزْهم لبعض إزاي يعني!! وأقول أية
للناس في البلد لما يجيبها وفي أيدها العيلين
والبت!!

علي: جوزها أخذهم منها مقابل إنه
ميفضحهاش في المحكمة إنها كانت متجوزة عرفي
وبتاخد معاش أبوها وإن الولاد كانوا من حقه في
فترة جوازها دي وهي كده كانت عاملة تدليس...
وفي الحالة دي هتكون قدام المحكمة غير أمينة
على الولاد وأمها ميتة أساسًا ف حضانتهم تروح
لأبوهوم فورًا بصفة دائمة... فمن قصيره كده عطته
الولاد وبقت فاضية.

فاضل: جوزها له يا عمدة ده إن هي رضيت.
العمدة: لأ... حتى لو اتسجن مش هجوزها له...
لا عاش ولا كان اللي يلوى دراعي ويخليني أعمل
حاجة غصب عني.
معتز: ده مش غصب يا حاج... ده تصحيح
غلط.

العمدة: وإنت مخلص ابنك يتجوز سهيلة ويقول
إن اللي في بطنها ابنه ليه يا دكتور؟؟

شوية لما يلاقيكم بتساعدوه.
مراد: العمدة لو عرف هيقتلنا.
سوزان: هو العمدة ده ناططننا كده في كل مصيبة!!

مراد: العمدة ده عمي يا سوزان حاسبي على كلامك.

سوزان (مُنفعلة): العمدة ده هو اللي عقد لوي وخلاه يادي بنات الناس... العمدة ده اللي خلانا نحب بعض في الحرام... العمدة ده اللي خلا مروان يتجوز عرفي عشان خايف منه... العمدة ده اللي عئس عمر وعلي وخلا اللي بيحبوهم واحدة عئست والتانية أترهبت... العمدة ده المفروض يتحاكم وربنا على جبروته ده.

مراد: زودي بقي إن العمدة ده بقي بيني وبينك... وللمرة الثانية مش هنعرف نتجوز بسببه.
سوزان: لا خليها على بابا المرة دي... إنت فاكّر بعد سهيلة ما تتعدم أو حتى تتسجن بسبب ابن عمك إن بابا هيرضى بجوازتنا دي!!
مراد: ده عقاب ربنا لينا.

سوزان: بس احنا توبنا وربنا سبحانه وتعالى بيقبل التوبة.

مراد: شكلنا توبنا متأخر بعد فوات الآوان.
سوزان: لا حول ولا قوة إلا بالله... عملنا الحرام محدش حس بينا... حبيننا نعمل الحلال

الناس وقفت ضدينا.
مراد: ده جزء من تمن التوبة.



الفصل الثالث عشر

دفاتر قدح



قرر علي أن يذهب ليزور كريستين في الدير الذي تقيم فيه ليستمد منها الطاقة كما يفعل دومًا كلما ضاقت الدنيا عليه...

كريستين: خير يا علي؟ شكك مهموم قوي المرة دي!!
علي: شايف الحق ومش قادر أنطق غير بالباطل.

كريستين: لسه بتخاف من عمك العمدة؟
علي: ومين قالك إن الموضوع تبع عمي العمدة؟!

كريستين: طول عمرك صاحب كلمة حق... مبتقلبش كلامك غير عشانه.
علي: عندك حق.

كريستين: طب احكي لي بالراحة.
وبعد أن قص عليها الحكاية كاملة...
علي: أنا دلوقتي عايز أدافع عن سهيلة لأن الوقت بيجري والمحامين اللي معاها مش قادرين يعملوا حاجة لأن وقت النيابة ماواجهتها بتقرير الطب الشرعي انهارت واعترفت علي نفسها.
كريستين: وعلى كلامك ف عمك حالف إن اللي هيقرّب منها هيطرده بره العيلة.

علي: أيوا... لو ع الطرد بره العيلة يبقى كان
من باب أولى إني أتجوزك من خمس سنين فاتوا.
كريستين: الكلام ده فات أوانه خلاص... خلينا
في اللي جاي... بلاش تغلط مرتين نفس الغلط...
مش عشان ضيعتني منك زمان بسبب عمك...
يبقى تضيع حياة سهيلة دلوقتي عشان عمك
يرضى عنك ويفضل مبسوط منك.
علي: إنت شايقة كده؟

كريستين: إنت نفسك مُقتنع بكده... عارف إن
عمك هيجي عليه يوم ويموت وإنت كمان هتموت
وقدام الرب هتحاسب لوحدهك... لو كنت جاي
النهاردة تاخد إذني إنك تطلع من عباية عمك
عشان خاطر سهيلة في الوقت اللي معرفتش تعمل
كده عشانى... فأكيد أنا فخورة بيبك وحاسة إن
بُعدنا هو السبب في الصحوة اللي إنت فيها
دلوقتي.

علي: صلي وادعيها دي ضحية لجبروت عمي
زينا.

كريستين: يحميها الرب ومن كان منكم بلا
خطيئة فليرجمها بحجر.
أما علي الجانب الآخر فلقد ذهب عمر في خلصة
إلى البلدة وهو مطمئن أن عمه العمدة لا يزال
بالمدينة ليتابع القضايا التي أنهالت عليهم تبعاً
وذلك ليُقابل سمية حُب عمره والذي لم يُشف منه

حتى الآن...
 عمر: وحشتيني قوي يا سمية.
 سمية (ساخرة): أنت عيان يا عمر!!
 عمر: عيان بيك
 سمية: وده من أيه بقى؟!
 عمر (مستعجلاً): أيه ده اللي من أيه؟!
 سمية: الحب والحنين اللي صحبوا من قبرهم
 ثاني فجأة.
 عمر: مين اللي قال إنى دفنتهم أصلاً؟!
 سمية: أنت يا عمر... أنت اللي آخر مرة قولتلي
 شوفي مستقبلك يا بنت الناس... كفاية الوقت اللي
 ضيعته من عمرك وانتي مستنياني... وأنا هأدفن
 حبي وحنيني ليك جوا قلبي... أنت نسيت وألا أيه
 يا مستر!!
 عمر: ده كان كلام في لحظة يأس.
 سمية (مُندهشة): لحظة يأس!! بعد سبع سنين
 مستنيك فيهم تخلص ثانوية عامة وكلية
 وبالواسطة اتعفيت من الجيش وقولت تبدأ تشتغل
 عشان تبقى مستقل لما تقول إنك عايز تتجوزني...
 وبعد كل الانتظار ده تنهي علاقتنا في لحظة يأس!!
 عمر (مذهولاً): أول مرة تبقى مُتحاملة عليا
 قوي كده!! ده حتى يومها لما قولتلك الكلمتين دول
 فضلتى ساكتة مردتيش غير بانك مش هتياسى من
 الحلم وهتفضلي مستنياني لآخر عمرك!!

سمية: وعشان كده بقى إنت جايلى بعد ما فات
على الكلام ده ثلاث سنين جاي تلحقني في آخر
عمري!!

عمر: بس إنتي لسه في عز شبابك.
سمية: عز شبابي ده اللي هو إزاي يعني؟! أنا
عديت الأربعين من شهرين لو مكنتش واخذ
بالك... زي ما أنت مكدتس بالك وإنت رابطني
جنبك بأن أحلي سنين عمري ضاعت واللي كان
ممکن أكون أم فيهم.

عمر: لما اتكلمنا في موضوع الخلفة ده من أول
ما حبينا بعض... إنتي قولتي إنك عايزة تبقي أم
لولاد مني أنا بس... وإن كان ممكن تتجوزي
جوازة تقليدية ويطلع جوزك مش بيخلف أو تكونوا
محتاجين علاج فيتأخر الحمل عندك لحد سنك
مايكبر... يبقى انتظار بانتظار فإنتِ قررتي
تستيني أنا.

سمية: أستناك وأنا معاك مش في الآخر تجيلك
لحظة يأس تخليني شايفة عمري كله بيطير أشلاء
في الهوا قدام عيني وأنا واقفة عاجزة إني أنقذه
من إنه يقع مكسور ومتفرقت مليون حنة على
الأرض!!

عمر: ولمّا أنا طلعت وحش قوي كده...
متجوزتيش راجل تاني ليه بعد لحظة يأس دي!!
سمية: أتجوز راجل تاني!! راجل ياخذ حطام

قلب منتهي الصلاحية!! لا يا مستر... لو إنت تقدر
تعمل كده وتظلم واحدة تانية معاك فمستحيل أعمل
أنا كده.

عمر: ومين قالك إنى أقدر أعمل حاجة زي
دي!! أنا من يومها مستنى الوقت المناسب اللي
ربنا يفك فيه الكرب وعایش على حلم اللقا من
تاني.

سمية: إنت شايف بقى إن ده الوقت المناسب؟

عمر: أيوه.

سمية: لمّا عمك انشغل عنك بقضايا ولاد
عمامك!! ده إنت حتى جاي وهو مش هنا في البلد.

عمر: مين اللي قالك حكاية ولاد عمامي دي؟!

سمية: إنت حياة المدينة نسّك إن في القرية

الدنيا صغيرة ومفيش حاجة بتستخبي!!

عمر: أنا عمري مكنتش بستغل الفرص يا سمية

بس دلوقتي الدنيا اتغيرت... ممكن تعتبري إننا

عملنا ثورة على عمي... علي ابنه خرج عن

طوعه ومسك قضية سهلة بشكل رسمي.

سمية: وإنت من بعده... يعني علي لو مكانش

عمل كده... كان زمانك مش هنا دلوقتي.

عمر: أبويا هو اللي قالي أشوف مستقبل زي

ماكنت راسمه من الأول وكفاية خوف من عمي.

سمية: أبوك... يعني لو مش علي يبقى أبوك...

إنما إنت لأ

عمر (متضايقاً): إنتِ ليه مُصرة تَقْلِي مني قوي
كده؟! إنتِ عمرِك محسستيني باني صغير قوي
كده قدامك!! ولا هو بعد الأربعين الدنيا اتغيرت
وأخذتني بالك إنك أكبر مني علي عكس ماكنت دايماً
بتقوليلي إنك بتحسي كأنك طفلة وإنتِ معايا!!

سمية (مصدومة دامعة): أقلل منك!! صغير
قدامي!! إنتِ لخصت مأساتنا دي كلها في الكلمتين
دول!! دايجني بسكينة باردة ومستكتر عليا أصرخ
وأنا بطلع في الروح!! وكمان جيه اليوم اللي
بتعابيرني فيه أنني أكبر منك!! متشكرة ليك قوي يا
مستر والحمد لله أنني عشت لَمَا سمعت الكلمتين دول
منك قبل عمري ما يخلص وأنا عايشة على حبك اللي
مش راضي يفارقني.

عمر (مرتبكاً): أنا.....

سمية: إنتِ تلحق ترجع مكان ماجيت قبل الليل
ما يليل عليك وإنتِ هنا متعرفش تخرج من البلد
فتضطر تبات في دوار العمدة وإنتِ أكيد نسيت
قرص الناموس عندنا شكله بيبقى إزاي.

عمر: سمية أنا.....

سمية: إنتِ كفتيت ووفيت وموفق والله معك.
عاد عمر من البلدة مُجرجراً أديال خيبة الأمل
عائداً لليأس من جديد...
فاضل: شكلك ميبشرش بخير.

عمر: رفضتني.

فاضل: طبيعي ومنطقي.

عمر: ليه؟!

فاضل: لأن مش بعد ما أنت إتخليت عنها
مستني إنها تفرح وتتنطط أول ماتقولها يالا بينا
نتجوز.

عمر: بقت قاسية قوي.

فاضل: انت شايف كده!!

عمر: أمال؟؟

فاضل: انت عمرك حطّيت نفسك مكانها؟ عمرك
حاولت تحس بوجعها شكله عامل أيه؟

عمر: أنا وضعي أصعب منها... أنا الراجل وأنا
اللي محروم منها، وأنا اللي جاي علي نفسي
وقاعد من غير جواز عشان بحبها، وأنا اللي
عارف إني لو اتجوزتها شبابها هينطفي بسرعة ده
لو لسه مانطفاش أصلاً وكمان مش هتلق تخلفلي
حتة عيل أو حتى على الأقل مش هتلق تربيته
معايا وهحتاس بيه بعدها ومع كل ده قابل
وراضي!!

فاضل: يااااااااااااه كل دي أنا... ده أنت على
كده نعمة كبيرة وهي الجاحدة رفستها برجلها!!
تصدق أقنعتني... البنت دي فعلاً مش وش نعمة
ومتستاهلش إنك اتكرّمت عليها وحصلت معجزة

ملكش دخل فيها ساعدتك إنك تتجراً وتأخذ خطوة
إنك عايز تتجوزها!! روح شوفلك واحدة ثانية
شابة أصغر منك تفرح معاها بشبابك وتخلفك عيل
واتنين وتلاتة وتربيهم معاك ويمكن كمان تحتاس
بيهم بعد منك.

عمر: إنت كمان هتيجي عليا يا أبويا!!
فاضل: آجي عليك أيه!! إنت لو تعرف دلوقتي
أنا متحصّر أد أيه على خلفتي ليك... روح يابني
الله يصلح حالي وحالك.
عمر: طب بس فهمنى بالراحة أنا غلطت في
أيه؟؟

فاضل: أول ما البنت تقول لأ كنوع من التعبير
عن غضبها... تيجي إنت تعايرها بإنك جاي على
نفسك وحارم نفسك من مُتَع الدنيا كلها عشانها...
إنت يمكن تلاقي واحدة ثانية فيها كل اللي إنت
نفسك فيه من الدنيا... بس عمرك ما هتلاقي واحدة
حبّتك زيها ولا هي هتكرر في حياتك تاني أصلاً...
ولو فرضاً لقيت زيها ف برضه هتكون زيها مش
هتكون هي.

عمر: حسيت إني صغرت في عينها قوي
وعشان كده كرامتي نقحت عليا.
فاضل: فكل اللي كان مستخبي جواك طفا على
الوش... وقت الشدة معادن الرجال بتبان...

ودلوقتي ده كان أشد وقت هي محتاجاك فيه بعد
ماحست بالضعف بعد الأربعين وإنها المفروض
تقولك لا قبل ما أنت تندم في المستقبل إنك
اتجوزتها في السن ده.

عمر: طب ما هي من الأول كانت عارفة إن
السن ده هيجي عليها واحنا سوا.
فاضل: كنتم هتبقوا متجوزين ومعاكم عيل وألا
اتنين وبدأتوا تكبروا سوا... إنما دلوقتي الوضع
اتغير.

عمر: بس أنا متغيرتش ولا حبها جوا قلبي
قل... بالعكس بيزيد كل يوم عن اللي قبله.
فاضل: يمكن... بس مطلعتش الراجل اللي هي
تعرف تتسند عليه وتتحمي فيه من الزمن... بعثها
عند أول مواجهة للمجتمع المُتمثل في عمك العمدة
ورجعت ثاني بعثها النهاردة عند أول أزمة نفسية
هي بتمر بيها... أزمة الأربعين.
عمر: يعني أسافر لها ثاني وأتكلّم معاها من
جديد؟

فاضل: حقها... حتى لو رفضتك ثاني.
عمر (مُندهشاً): هي ممكن ترفضني ثاني؟!
فاضل: طبعاً... بس المرة دي هيكون رفض حب
وإيثار... هتبدّيك على نفسها... علشان تعمل بيت
مع واحدة تعرف تعمل معاك أسرة وأولاد وكل

الكلام اللي إنت قولته وإنت غضبان.
عمر (مُصَرِّاً دامعاً): أنا مش عايز حاجة من
الدنيا غيرها هي وبس والله العظيم.
فاضل: يبقى ده تقوله لِمَا تروح تطلبها للجواز
في المرة الثالثة إن شاء الله.



الفصل الرابع عشر " الأخير "

في المحكمة



بعد سماع هيئة المحكمة لمُرافعة النيابة ومناقشة الشهود جاء دور الدفاع عن سهيلة ليتلو دفاعه الأخير عنها، ولم يكن لُوي ومعتز ومراد متواجدين في قاعة المحكمة وكانت مفاجأة للجميع وأولهم العمدة الذي كاد يفقد الوعي من هول هذه المفاجأة بأن قام المستشار فاضل ليخبر هيئة المحكمة بأنه انضم لفريق الدفاع عن سهيلة بعد أن قدّم استقالته عن دوره كمستشار في مجلس الدولة ليدافع عن سهيلة؛ فهو مقتنع بأنها هي الأخرى ضحية...

فاضل: أرجو من سيادتكم أن يتسع صدر روح العدالة لديكم لسماع قصة صغيرة وإن كانت في بدايتها لا توحى بأنها قد تُفيد القضية بشيء إلا أنها هي السبب في تجمُّعنا هنا اليوم. القاضي: اتفضل.

فاضل: تبدأ هذه القصة في قرية صغيرة بطلها الأول هو العمدة الكبير الحاج الأسيوطي رحمة الله عليه والذي رزقه الله سبحانه وتعالى بثلاثة أولاد، حَلَمَ معهم بأن يُصبح الكبير خليفة له في العمودية، وأن يصير الأوسط مستشاراً في هيئة القضاء العالي إلى أن يُصبح يوماً وزيراً للعدل لتحقيق العدل في كل

أرجاء المحروسة، وأن يصبح الصغير هو طبيب القرية على أن يبني له فيها مستشفى خيرية يُعالج فيها الغلبة من أهل القرية.

كان هذا الحلم النبيل هو مصنع ما تلاه من أحداث بعد ذلك حيث توفي الأب وخلفه الابن الأكبر في العمودية وصار الثاني رئيس نيابة وقتها كما كان الجزاء الأول والثاني من الحلم وأصبح لزاماً على الصغير أن يحقق باقي حلم أبيه.

ولكن الصغير كانت له أحلامه الخاصة فبعد أن سافر لندن والتحق بجامعة أكسفورد ونجح فيها وأصبحت له حياته الخاصة هناك، تزوج من فتاة إنجليزية تحترف الرسم التشكيلي بعد أن أنجبت له ولده الوحيد، وليركز الجميع هنا فلقد تزوج بها بعد أن أنجبت ولده الوحيد، بعد وليس قبل.

بعد وفاة العمدة الكبير فلقد أجبر العمدة الجديد أخاه على العودة إلى مصر لتكملة حلم أبيهما فجاء الأصغر مضطراً لينفذ وصية أبيه، ولكن زوجته الإنجليزية رفضت أن تترك حياتها المزدهرة هناك وتأتي لتستقر في بلدة صغيرة تكاد ألا تظهر على الخريطة ولا يشعر بها أحد.

صمم العمدة كذلك على عودة الولد مع أبيه ليتربى تربية شرقية مُطعمة بالعادات والتقاليد والأعراف ووافقت الأم نظراً لظروف تنقلها بين المعارض والمتاحف في أوروبا طوال الوقت؛ ففكر

الابن المزدوج الجنسية وهو لا يسمع من عمه
العمدة عند مناداته إلا كلمة " يابن الخواجية "
كان يظنها في البداية مدحاً وتمييزاً ولكنه عَلمَ
عندما كبر بأنها سُبَّة يسبه بها لاعتباره عفوًا "
ابن حرام " كما ذكرت سلفاً ولكون أمه مُجرمة
خاطئة بأنها سلّمت نفسها لحبيبها دونما زواج
حتى وإن كان أول من دخل حياتها، وليركز معي
الجميع مرة أخرى- أول من دخل حياتها- أول.
وهنا نمت العقدة عند الطفل ليصبح شاباً يافعاً لا
هواية لديه إلا جعل كل العذراوات يستسلمن له
حتى لا تصبح الخواجية وحدها هي المجرمة
الخاطئة، ومع مرور الوقت كان لابد للعقدة أن
تتطور فجاءت الرغبة في التوقيع بفتاتين أقل
وصف كان يقال عنهما أنهما روح واحدة في
جسدين.

وأقصد هنا سها وسهيله، وهكذا نعود ليوم
ارتكاب الجريمة والتي اعتبرها مُدبرة منذ حُلِمَ
العمدة الكبير بحلم استبد فيه بملكيتِه لأولاده الذين
وهبهم الله له " يهب لمن يشاء الذكور "، كما تم
البدء في تنفيذ هذه الجريمة على يد الابن الأكبر
الذي أصبح العمدة خلفاً لأبيه ليستبد هو الآخر
بحياة أخويه تنفيذاً لوصية والدهم.
في ذلك اليوم سافر الأستاذ عبدالغفار والسيدة
فريدة إلى بلدتهم لتقديم واجب العزاء وكالعادة

خرجت سها إلى شرفتها لتعطي سهيلة صديقتها
 التقرير اليومي عندما يتعذر الاتصال الهاتفي
 وطلبت منها الحضور لقضاء بعض الوقت معها
 ولبت سهيلة الطلب ودار بينهما الحوار كالتالي...
 سها: عايزة أقولك على سر بس احلفي بربنا
 إنك مش هتقوليه لحد خالص.
 سهيلة: والله أزعل منك... إنت من إمتى
 قولتيلي سر وأنا طلعتة بره!!
 سها: أنا ولؤي خلاص هنتجوز.
 سهيلة: قديمة ما أنا عارفة إنكم اتخطبتوا من
 أسبوعين يا واطية.
 سها (مُدهشة): مين اللي قالك؟
 سهيلة: إنت ناسية إن أنا وهو أصحاب من
 ساعة ماخلت الجامعة وروحت مكتب الديكور
 بتاعه أتدرب معاه فيه.
 سها: بس هو قالني إنه مقالش لحد خالص على
 الموضوع ده!!
 سهيلة: وهو أنا أي حد برضه!! عيب عليك.
 سها: بس هو قالني إنكم أصحاب خفيف خفيف
 وإنه مقصر معاك من ساعة ماخطبني.
 سهيلة: ليه؟!
 سها: عشان حس إنك ميالة له فحب يبعد عنك
 شوية لحد ماتتعودي على غيابه.
 سهيلة (ساخرة): ههههههههههههه هو فهمك

كده!! مسكينة..

سها: ليه بتقولي كده؟

سهيلة: أنا ولؤي مبقاش ينفع نبعد عن بعض خلاص.

سها: مش فاهمة!!

سهيلة: اسألينه وهو يفهمك.

سها: واسأله هو ليه وإنّ قدامي وممكن

تفهميني!!

سهيلة: مش هتصدقيني.

سها (متوترة): والله هصدقك وهو أنا من إمتى

كدبتك في حاجة قولتيها قبل كده!!

سهيلة: أنا ولؤي مرتبطين من بعد ما عرفته

بشهر واتفاجئت بيه جاي من أسبوعين يقول لي إنه

خطبك... ثورت واتخانقت معاه وحلف لي إنه مضطر

يعمل كده.

سها: مضطر!!

سهيلة: أيوه... لَمَّا عرف مني إن حالتك

النفسية تعبانة بسبب سخافات كريم معاك... قرر

إنه يخطبك عشان ثقتك في نفسك ترجعك تاني...

ويعد مايطمن إنك بقيتي كويسة... بييجي يقولكم إنه

كلم العمدة علي جوازكم بس رفض عشان كان

مكتوب كتابك قبل كده وهو مستحيل يتجاوز من

غير رضا أهله.

سها: وإنّ وافقتيه على كده!!

وانتِ غرقانة في دمك.
 سها (مصدومة): هو اللي قالك؟
 سهيلة: ماقولتلك مبيخبيش عني حاجة
 خالص... بعد ماقفل معاك كلمني يعترفلي لإن
 ضميره كان مآنبه إنه خاني معاك.
 سها: خانك معايا!! ده ألي ضميره آنبه عليه!!
 طب وأنا والفضيحة اللي هتفضحها دي!!
 سهيلة: إنت كان مكتوب كتابك قبل كده... يعني
 ممكن تلبسها لكريم وهو مش هيقدر يثبت حاجة
 وخصوصاً إنه دلوقتي غير متزن وصعب حد
 يصدقه لو قال إنه معملش كده معاك.
 سها (مذهولة): كانه كان مرتبها من الأول!!
 سهيلة (مهزومة): إنت عملتي كده ليه؟؟ طب
 أنا طايشة وملقتش اللي يربيني كويس... أب كل
 همه الفلوس ورمى أختي الكبيرة لزوج كارهة
 العيشة معاه بكرشه المليون فلوس ده... وأم طول
 النهار مش وراها حاجة غير إنها تشتكي من
 جوزها ومن خيانتة ليها طول الوقت لَمَّا عقدتني
 من الرجالة لحد ما لقيت لوي وخدعني بحنيتة...
 إنما إنت عملتي كده ليه؟
 سها (مهزومة هي الأخرى): الكبت وعدم الثقة
 في النفس... أبويا كابنتي طول الوقت مابين حرام
 وعيب... عمره ماقالي حرام ليه أو عيب عشان
 أيه... ده غير سي كريم اللي كسر نفسي بعد

موضوع أخته وانتقم من اللي جوزها بيعملوا فيها
منى أنا

سهيلة: كريم عمره مابطل يحبك وكلنا عارفين
إنه لجأ للترامادول لما لقي نفسه قليل الحيلة ومش
عارف يحمي أخته... حس بنقص وحس إنه بقى
صغير قدامك فهرب من شعوره ده بالترامادول.

سها: لوي عوضني عن كل ده بحنيتته وحلفلي
إن عمره مهيبد عني ولا حتى بموته... قالي حتى
لو مت هبعث روجي ترعرع حواليك طول الوقت.
سهيلة: وصدقته؟!!

سها: حلفلي وأقسم بالله العظيم.
سهيلة: هو طول الوقت بيحلف ويقسم بالله...
المهم هتعملي أيه دلوقتي؟

سها: هكمل الخطوبة وهتجوزه.
سهيلة: وأنا واللي في بطني منه ده!!
سها: نزلي الحمل وأعملي ريتاج.
سهيلة: يا سلاماااااام ومتعمليش الريتاج انت ليه
بدل ما أنا أقتل ابني جوايا وممكن أنا شخصياً
أروح فيها؟!

سها: انت أهلك هيتفهموا موقفك وهيساعدوك ده
لو حسوا بيك أصلاً... وقتها هتقولي لبابك إن ربنا
انتقم منه عشان بيخون مامتك... إنما أنا هعمل أيه
مع بابا!!

سهيلة (مدهشة): إنت هبلة وألا بتستهلي عشان

أفهم!!

سها (جادة): لا ده ولا ده.
سهيلة: يا بنتي بقولك جيه حكالي بعد اللي عمله
معاك وده معناه إنه شاريني أنا... وعلى فكرة هو
اللي قالى أعرفك دلوقتي باللي قاله بان إنت تقولي
فيما بعد لما يتقدمك عريس ثاني إن كريم هو اللي
عمل معاك كده.

سها: هو عارف إنك طالعالي دلوقتي؟
سهيلة: أنا مبدخلش الحمام غير لما أقوله يا
بنتي عشان لو اتصل ميزعلش لما مردش عليه
وقتها.

سها (متوترة): طب وهي عمل أيه مع بابا؟
سهيلة: هو عارف إن باباك دلوقتي في عزرا
وعشان كده هيسنتي لبكرة وهي بقي يفوت عليه في
الشغل عشان يقوله إن عمه رفض الجوازة وهو
مقدرش يقتعه.

سها (مشوشة): كل ده عشان خاطرك!!
يخطبني عشان إنت زعلانة عليا ويسيبني عشان
إنت تتجوزيه!! طب عمل معايا كده ليه مادام ناوي
يسيبني من الأول؟؟

سهيلة: لما اتخانقت معاه وقت ما قالى إنه عمل
معاك كده... راح رادد عليا بانها لحظة ضعف
إنساني وهو إنسان مش ملاك بجناحين.
سها (ساخرة): وطبعاً صدقتيه!!

ضحاياه.

فالعمودية والعادات يقولان لا لزواج المصرى من أجنبية خارجة عن التقاليد التي نعتنقها نحن كمجتمع شرقي، ولا لزواج المسلم من مسيحية، ولا يتزوج الرجل الصغير من المرأة الأكبر منه سنًا، ولا يتزوج الشاب من امرأة مطلقة مالم يتزوج هو الآخر من قبل، وكل هذه العادات فرضها العمدة على الأحفاد، الكل دفع الثمن سواء الأبناء أو الأحفاد أو من عبروا حياة هؤلاء الأبناء والأحفاد.

سهيلة ضحية كما كانت سها ضحية وغيرهما فتيات كثيرات والجاني الأصلي في هذه القضية هو العادات والتقاليد التي سهّلت الحرام وأغلقت باب الحلال في وجه من أراده، فإذا أردت أن يحترمك الناس في هذا المجتمع المصاب بداء ازدواج الشخصية فافعل ماتريده خلف الأبواب المغلقة في الظلام ثم أخرج للناس في النور وأنت ترتدي عباءة المجتمع الجميلة المرصعة بالعادات الذهبية والتقاليد اللؤلؤية والأعراف الفيروزية.

ولكن العمدة لم يكن هو المنفذ الوحيد لهذا المخطط المجتمعي العقيم بل كان له شركاء؛ فوالد سهيلة كان مساعدًا فهو ذلك الرجل السكير العبيد الذي مضى من عمره الكثير والكثير ضائعًا على ملذاته واللهث وراء شهواته تاركًا وراءه زوجه

يائسة محرومة من الحنان لتكون هي المثل أمام ابنتيها، ومن منطلق يمهّل ولا يهمل فجاءت متحققة في سهيلة ابنته ليتجرع من نفس الكأس الذي طالما أذاقه لكثيرات وكثيرات، وهذا لا يعفي مطلقاً لؤي مما فعله معها ولكل جزائه يوم الحشر العظيم تحت عرش الرحمن.

وكان هناك مساعداً آخر غير والد سهيلة ألا وهو الأستاذ عبد الغفار والد سها الذي أغلق عليها بالمتاريس بحجة الخوف عليها، وما كان ذلك سوى مبرراً واهياً يخبي خلفه بخله الشديد والذي كان أسلوب حياة؛ فكان بخيلاً حتى في حنيتيه ومشاعره على زوجته وابنته التي اضطرت في النهاية أن تبحث عن هذه الحنية المفقودة داخل منزلها خارج المنزل مع أول رجل أظهر لها فيض شلال من الحب والحنية والمتعة.

سها وإن كانت مارست معه الرذيلة فليس ذلك دليل على نقص دين أو زيادة شهوانية، ولكنها أرادت أن تقدم هدية لمن أذاقها الحب والحنان ولكنها لم تجد أعلى من نفسها لتقدمها له هدية، ذلك الشاب المُستهتر العابت كما يبدو ظاهرياً اليائس المحروم فعلياً من الحنان والاحترام ممن كان له قدوة ومثل أعلى طالما نظر له وهو صغيراً على أنه مثال الهيبة والاحترام ليجده يحتقره طوال الوقت، مما جعله يفقد الثقة في نفسه وفي مجتمعه وجعله

يستدعي طاقة الشر الكامنة بداخله ليمرّد على ذلك المجتمع السطحي الظالم.
وهكذا يكون المجتمع هو القاتل الحقيقي ليس لـ
سها وبرائتها فقط إنما هو من قتل العُذرية في
سهيلة وقتل الرجولة والنخوة بـ لؤي، حاكموا
المجتمع وعاقبوه إن استطعتم قبل أن تعاقبوا هذه
الفتاة والتي لا اعتبرها جانية ولكنها مجني عليها
هي الأخرى.

وعذرا على الإطالة وإهدار وقتكم الثمين،
وأرجو من هيئة المحكمة الموقرة إرفاق هذا
الملف بأوراق القضية، حيث يحتوي على تقرير
طبي بأن لؤي قد تم بتر عضوه الذكري أثناء
مشاجرة بعدما تعرّض له مجموعة من المُلثمين
ليلة أمس أثناء عودته من عمله للمنزل والذي كان
يستعد للسفر بعد المحاكمة عند والدته ليتلقّى العلاج
النفسي هناك بعد أن أقنعه والده بذلك، وهو الآن
بالمشفى في غرفة الرعاية المشددة مُعلّق بين الحياة
والموت، وليتجاوز الله عن سيئاتنا أجمعين.

القاضي: ترفع الجلسة للمداولة.
الحاجب: محكمة.

تمت بحمد الله



نبذة شخصية

- ♥ هبة سعيد مواليد ٢٦ يناير من الأسكندرية.
- ♥ الأعمال الإلكترونية: منها "ذنب لا يموت"، "فلاش باك"، "شلة بنات".
- ♥ الأعمال الورقية:
- "ليدو"، "استحلال"، ضمن المجموعة القصصية: "نون النسوة" تحت مبادرة نساء مُبدعات.
- ♥ من أحلامي:

أن يعود الحب للقلوب والذي تُحل به كل المشاكل على أن يكون مصحوب بالثقة والاحترام والتفاهم.

♥ أن تعلم كل فتاة أنها كائن مستقل وليست تابع، فلا مانع أن يكون لها شريك في الحياة ولكن

لا يجب أن تكون أمة لهذا الشريك.

♥ أن تعلم كل فتاة وتتيقن أن من يحبها
سيسعى أن يعاملها معاملة الأميرات بأن يتوجهها
شريكة لحياته في العلن مُتَشَرِّفًا بأن تكون هي أُمًّا
لأولاده، أما من يحتفظ بحبها سرًّا فهذا لا يتعامل
معه إلا ك محظية مهما كان حديثه لها مغزول
بالكلام المعسول والوعود الواهية والمبررات
الكاذبة.



الفهرس

٣	مقدمة
٤	إهداء
٥	الفصل الأول: جريمة قتل
١٢	الفصل الثاني: شقة العُزَّاب
٢١	الفصل الثالث: في النيابة
٢٧	الفصل الرابع: في مكتب علي المحامي
٣٥	الفصل الخامس: وشوش
٤٣	الفصل السادس: شهادة جديدة
٤٩	الفصل السابع: مُتهم جديد
٥٦	الفصل الثامن: حادث جديد
٦٣	الفصل التاسع: كلمة الطب الشرعي
٦٧	الفصل العاشر: شهادة الأم
٨٠	الفصل الحادى عشر: قرارات العمدة
٨٤	الفصل الثاني عشر: من القاتل؟!
٩٥	الفصل الثالث عشر: دفاتر قديمة
١٠٥	الفصل الرابع عشر " الأخير": في المحكمة
١١٨	نبذة شخصية
١٢٠	الفهرس

